


# NKONKO NÈ MANDAMUNA

 Nènku ndi nè disànkà dyà kwikala cyàkàbìdì kaaba aka dilòòlò edi mu mudimu wà Mukalenge wetù. Nè mpindyewu, pa kunùmòna nwènù bònso nè disànkà nè nwimba misambu milenga milaya yà nkulunkulu eyi, bònso bùle tètè nè nyumà nè bikwàbò, bìdì bìtùfikisha ku didyumvwa bìmpè byà menemene.

<sup>2</sup> Nènku tudi nè disànkà dyà kuteeta kwangatakù kàbìdì ndambù mukesè wa dîbà dilòòlò edi bwà kwandamuna ku lukonko kampànda anyi yibidì. Tudi bu banwangàte dîbà dyènù dyàbùngì mu dindà emu, kàdi ndi ntèkemena nè nudi bapete dibènèsha dîmvwà mupetè ànu mu dibyàkula. Cìdi. . . Nudi bamanyè's, tudi nè byàbùngì byà dyamba, kî mmwòmò anyi? Nè tudi nè Muntu wa kwakula bwèndè, awu's m'Mukalenge wetù Yesù.

<sup>3</sup> Mwanèètù Teddy, bu mèmè mwà. . . bu wèwè mwà kuswà, shààla wèwè ànu kaaba aka bwà katanci kakesè cyanààna. Bàvwa bandondèle nè kùvwa mwànà mukesè uvwa usaama mu nzùbu emu.

<sup>4</sup> Nènku kumpàlà kwà mèmè kubanga pa cyòcì eci, tudi nè Mèèsà à Mukalenge (pa nànkù tudi baswè. . . katwèna baswè kwangata dîbà dipitèpìte bùngì to) nè pàmwàpa kùdì dibàtiiza. Nènku bôbò. . . Ndi muswè ku—kusambidila aba bàdì baswè bwà kubàsambidila abu dyàmbedi, bwà nè eci, kusambidila babèèdì dyàmbedi, kumpàlà kwà mèmè kutwàdija.

<sup>5</sup> Nènku mpindyewu, bu. . . Teddy, bu wèwè mwà kuswà, imbàku ku cisanjì musambu ewu wà nè: *Ngàngàbukà Munène Udi Pabwìpì Mpindyewu*. Nènku netùbìikidishè babèèdì nè kubàlòmbela mabènèsha mwab'ewu. Mbanganyi bàdì kaaba aka bwà kubàsambidilabò dilòòlò edi? Kùvwa bàmwè batùvwà katùyì basambidile mu dindà emu to. Wèwè mweleshe byanza byàbò muulu, pawikalà. . . [Katùpà kàà mukàbà wa mèyì munda mutupù—Muf.] . . nè kuumvwa bujaadiki abu, nè kutùmbisha Nzambì bwà bwìmpè Bwèndè bwónsò. Nzambì àtumbè Yèyè mwena kùdì mabènèsha ònsò àlòkela. Ncyà bushùwà anyi?

<sup>6</sup> Mpindyewu, netùbangilè buludi lùkàsàlùkàsà pa majaaniki aa mpindyewu, nènku netùteetè, anyi, mfwilaayikù luse, pa nkonko. Nènku ndi ntèkemena nè Nzambì neàpòngololè ànu mabènèsha Èndè mu—mu mùshindù ewu.

<sup>7</sup> Nènku mpindyewu, kanùndekèdiku ntàmba kujàngulukapù ntàntà mupitèpìte bule to. Mwanèètù Cox, nèngùikalè mwà kukòka ntèmà yèbè, wèwè nè balami bàdì basòmbe ku mulongo wà kumpàlà abu, bwà kungiimanyika pàndì. . . pàkaadi dîbà dyà kutùpèèsha Mèèsà à Mukalenge dyàmba kukùmbana

(nudi numòna anyi?), bwalu ndi mbàlama ntàntà mupitèpìte bule. Nènditácishè bwà kuya lùkàsà nè mwànyì mwònsò. Nè pashìishe, mèmè nciyì muyìjikije mu dyàlumingu edi to, Nènyàngàtè mu dyàlumingu dilwalwà; to, nènteetè bwà kujikija dilòòlò edi.

<sup>8</sup> Yòyì's nkonko mímpè be. Nènku ndi nnwàmbila, balundà bàànyì, bu nè kakùvwa ditàbuluja nè bintu munkaci mwà kwenzeka to, mvwa mwà kujinga kutèeka bu lumingu lujimà nànkù ànu buludi pa malongesha à Bible à . . . à Genèsè, nè Ekèsòodè, nè Bwàkabuulwibwà, nè bikwàbò, nè—nè kupicila ànu mu cikondo cilenga cyà—cyà menemene. Mèmè ntu munangè nkonko yà ndòndò yà mu Bible nè malongesha à mu Bible, paùdi ànu kùyì ulaluka pa cintu kampàndà cikwàtakaja to. Kushààla ànu buludi mu Dìyì dyà Nzambì dyà kale, dìdi kadiyì disambakaja, ditòòke tòò adi; neDìkufikishe nè ku ndekeelu. Kanwèna nwitabuuja nànkù anyi?

<sup>9</sup> Èè aci, mu dindà emu, tuvwa nè yimwè yà—yà ku nkonko yà mitàmbe bwímpè, yimwè yà ku yòyì yidi yitàngila binunu lukàmà nè makùmi ànaayi nè binaayi, bàvwa mbanganyì, nè bàvwa mwà kwikala citùpà kaayi? Nè—nè bwà Mukàji-musèla. Nènku kaa, ànu bintu búngì cyanààna, nè nkonko ànu yà ndòndò menemene. Nènku mvwa nè ndambù yimvwà nciyì mujikije to.

<sup>10</sup> Mpindyewu, dilòòlò edi netùbangilè buludi ànu pa elu nùnkù, nè tùlombè Mukalenge bwà kutùkwàcisha. Nènku mpindyewu, katwèna mwà kukàngula Bible to. Tudi mwà kuMubuulula nùnkù ewu, kàdi bidi bikèngela Nzambì bwà kutùkàngwilaYè bulelèlè. Tudi mwà kubuulula mabèji. Kàdi mu Mukàndà wà Bwàkabuulwibwà, pàakatàngila Yone, nè kumònayè Kampàndà musòmbe pa Nkwasa wa butùmbi, nè kùvwa . . . Úvwa nè Mukàndà mu cyanza Cyèndè. Nènku kakùvwa muntu nànsha umwe uvwa mukùmbànyine kwangata Mukàndà, anyì kulamuna Bitampì, anyì mene kuwùtàngila to. Muntu nànsha umwe mu Dyulu, muntu nànsha umwe pa buloba, anyì muntu nànsha umwe mwínshì mwà buloba, anyì mwaba nànsha wùmwè kàvwa—kàvwa mukùmbànyine to. Kàdi wàkamòna Mwànà wa mùkòòkò, mwenze bu Uvwa mushipiìbwe kacya ku difùkà dyà dyulu nè buloba. Nè kulwaYe nè kwangata Mukàndà mu byanza Byèndè nè kukàngula Bitampì; Úvwa n'Yesù Kilistò.

<sup>11</sup> Mpindyewu, mvwa nyiikilangana nè muntu kampàndà mu lumingu emu, mwena kantu-ku-byanza mumanyika bikolè mu cimenga emu, uvwa ungambila bwà dyàlukila dyà mu Àfrikè nè mu Inde: wàmba nè: “Mòna's, mbacifùmina ku dishebeya dyà kalààlè kàà màsàlaayi kàà ba-Britannique kuntwaku.”

Mèmè nè: “Aci cìdi naanyì bwalu kaayi?”

Yèyè nè: “Udi walukila kuntwaku kùdi dishebeyangana dyònsò munkaci mwà kwenzeka, ndululu yà bisà, nè bikwàbò

abi's?"

Mèmè nè: "Bushùwà, kwòkò aku's ke kùdìbo naanyi dijinga, kùdì Mukalenge muswè bwà mèmè kuya."

Yèyè nè: "Amba tǔng bu bôbò mwà kukushipa?"

Mèmè nè: "Èè, bu Nzambi mwà kuswà bwà mèmè kushipiibwa, nènshipiibwè ànu's, kwàjiki."

Ki yèyè nè: "Kaa, ekèlekèle!" Yèyè nè: "Mwanèètù Branham, kabìwva bikèngela bwà wèwè kwela meeji mùshindù awu to. Èè," yèyè nè, "ncyèna mbicyùka to. Ndi ngèèla meeji nè wèwè udi mutèndeledi, nè ndi ngèèla meeji nè udi muntu mwimpè," yèyè nè: "kàdi's bàakashebeya mene nè Yesù Kilistò."

Mèmè nè: "Bushùwà's, cìwva ndiswa dyà Nzambi."

Yèyè nè: "Cinyi? Diswa dyà Nzambi?" Ndi. . . Nè muntu awu ùyaaya mu èkèleeziyà (ùkaadi pabwipi nè bidimu makùmi mwandamutekète), ùya mu èkèleeziyà (yèyè mmufùnda pa mukàndà wà èkèleeziyà mulenga mu cimenga eci), nè mukolè mùshindù awu, kàdi kacya kàyiku mumanyè nè cìwva ndiswa dyà Nzambi bwà Yesù kufwàyè to.

<sup>12</sup> Mòna's, mèmè kwamba nè: "Mwanèètù, Yèyè's wàkashipiibwa kacya ku difùkà dyà dyulu nè buloba, kacya ànu ku cibangidilu mene. Wàkashipiibwa kumpàlà mene kwà Yèyè kufika pa buloba." Ncyà bushùwà anyi? Yèyè ùwva Mwànà wa mùkòòkò wà Nzambi mushipa kacya ku difùkà dyà dyulu nè buloba.

<sup>13</sup> Twǎnjàayi kwakula Nendè katanci kakesè cyanààna bwà nkonko ayi. Mpindyewu, Taatù, twètù katwèna bakùmbànyine, nè katwèna bakùmbàne to, tudi bamanyè, bwà kubuulula Mukàndà anyi kuwùtàngila. Kàdi Mwànà wa mùkòòkò àlwekù mpindyewu dilòlò edi, Mwànà wa mùkòòkò wà Nzambi wàkashipiibwa kacya ku difùkà dyà dyulu nè buloba awu, kwangata bintu bìdi byà Nzambi nè àbìleejà disangisha. Nyumà Mwimpè àmbuleku mèyi aa, bwà kaikadikù mèyi àànyì anyì mèyi à muntu to, kàdi ìkalèku Mèyi à Nzambi kùdì mwoyi wònsò wùdì nè nzala. Bwalu tudi tulòmba nùнку mu Dìna dyà Yesù. Amen.

Lwà kumpàlà alu mwab'ewu (katwèna naayi milondàngàne anyi cintu kampàndà to, kàdi ànu mùshindù wùvwàyi milwè awu), bìdi bimwèka bimpè be. Dyàmbedi, mbanganyi bàdi bùmvwà bwalu bwà nkonko bubàtàngile? Tùmonèbi byènu. . . Èè, abi's mbilenga byà dikèma. Bwà ngìkalè ànu mumanyè.

**15. Mpindyewu. Muntu ku lufù ùdi ùya mu Dyulu anyi—anyi mu ifernò dyàkàmwè, anyi ùdi wìndila dilumbulwisha anyi?**

<sup>14</sup> Aci's ndukonko lwimpè lwà dikèma. Nènku bìdi byènta. . . ndufwànyine kukùmbanyina dikenketa dimpè menemene, bwalu muntu yònsò mmuswè kumanya, ciikalàye ncinyi paanyimà pàa mwoyi ewu mumanè kujika? Muntu yònsò mmuswè kumanya.

Èè mpindyewu, mèmè, bwà lwànyì luseke, ncyèna—ncyèna mufwànyine kumanya to. Bikèngela ngàandamwinè ku Bible.

<sup>15</sup> Ngèèla meeji nè mukàjì kampàndà mmutùùle ndola makùmi àtaanu yà kwakula ku nshinga kwènji katanci lwà ku Los Angeles, tusunsa tutwè ku makùmi àsàtù nè tùtaanu anyi makùmi ànaayi, anyi pàmwàpa tupìte apu, dibìikila dyà ntàntà mule, ùteeta bwà kumfikisha ku dyamba nè bìvwa bilondèshile mikenji nè bijaalàme bwèndè yèyè bwà kushiya bàyèndè nè kusèdiibwa kùdi mulùme mukwàbò. Ncyèna mufwànyine kucyènza to. To! Mèmè nè: “To, mukalenge!”

Yèyè nè: “Èè, bàyaanyi’s nngènzàmpèkààtù, nè muntu ewu mmwena Kilistò.”

<sup>16</sup> Mèmè nè: “Aci kacyèna naaci bwalu to. Wèwè newikale mu masandi cyàbushùwà ànu mùdi cintu cyònsò eci.”

Yèyè nè: “Èè, mèmè’s ndi nè disaamà dyà cyàdi, nè kabyèna bikèngela bwà mèmè kwikala nè mwoyi to bu mèmè nciyi mwà kupeta muntu ewu.”

<sup>17</sup> Mèmè nè: “Udi ànu umwalakana cyanàànà nè kwèna mu dinanga to, bwalu kùvwa mwà kwikala mu dinanga to, kwàjiki, bwalu wàwa nàka mbàyeebè. Nè wèwè udi mwenze mucìpu bwà kusòmba nendè too nè pàànùtàpululà lufù. Cintu cyònsò cikwàbò cidi kaciyi aci to, udi mu masandi.” Nè pa nàнку, yèyè ùvwa ànu kacya wàkùlamakù. Mèmè nè: “Inàbànzà, kabyèna nè dikwàcisha to. . .”

Yèyè nè: “Bu wèwè ànu mwà kungambila nè bìdi ànu bìmpè.”

Mèmè nè: “Ncyèna mufwànyine kucyènza to.” Mèmè nè: “Ndi. . .”

Yèyè nè: “Èè, Mwanèètù Branham, s’tudi nè dyeyemena dyàbùngì be kùdi.”

<sup>18</sup> Mèmè nè: “Nàнку tèèlejaaku cìndi nteeta kukwambila eci. Ndi nkwàmbila Bulelèlà, bwalu ncyèna nè cìndi mwà kwamba nànsha cimwè to ànu cidi Nzambi mwàmbe.” Nzambi mmwambè nè aci ncilelèlà, pa nàнку ke mùshindù wùdìbi menemene. Nwamònu anyi? Mèmè nè: “Mùshindù awu ngùdìbi—ngùdìbi nè cyà kwikala, nè mùshindù awu ngùdìbi bikèngela kwikala.”

<sup>19</sup> Nèнку mpindyewu, mu nkonko eyi, ke mùshindù wutùdi baswè bwà kwikalayi ngwòwò awu. Mpindyewu, bàtu misangu yònsò ànu bèèla meeji nè. . . Mpindyewu, mwab’ewu, nudi bamanyè’s, mu dyanza dikesè dyà bantu edi dilòlò edi, kùdi pàmwàpa mmwènenù mishilàngàne yà mishindù yònsò; nè tudi twela meeji nè yònsò ayi mmìmpè, yònsò wa kùdiyì. Mmwènenù webè awu mmwìmpè, nè wùdi. . . Kàdi mpindyewu, citùdi twenza, bikèngela twikale nè muntu kampàndà. . . Bu mùdi nyuunyi yà byòwà, mabata, anyi ní ncinyi cikwàbò, cintu cyònsò ci-. . . mbùlùbùlù, byònsò bìdi nè mulombodi. Mukalenge-mukàjì lubùlùbùlù yèyè mufwè, s’udi mumanye

cidi cyenzeka. Dibata dilombodi dyôdi difwè, bikèngela bwà bôbò kupeta dikwàbò. Bwalu, bikèngela ànu bwà biikalè nè mulombodi.

<sup>20</sup> Nènkù bikèngela bwà muntu ikalè nè mulombodi; nè Mulombodi awu n’Nyumà Mwímpè. Nè Nyumà Mwímpè mmutèèke mu Èkèleeziyà dyàmbedi, bàpostòlò, paanyimà pàà aci, baprófetà, nè bikwàbò.

Muntu kampàndà ùvwa wàmba ànu àbìdi àdì panshì aa, wàmba nè: “Mòna’s, Mwanèètù Branham, katwèna dijinga nè muntu kampàndà bwà kutùlongeshayè to. Pààlwà Nyumà Mwímpè, katwèna dijinga nè muntu nànsha umwe bwà kutùlongesha to.” Yèyè nè: “Bible ùdi wàmba nè kwèna—kanwèna nukèngela dilongesha to.”

<sup>21</sup> Mémè nè: “Kàdi bwà cinyi Nyumà Mwímpè umwèumwè awu wàkatèèka balongeshi mu Èkèleeziyà, nwamònu’s, nwamònu’s, nè wàkatèèka Èkèleeziyà mu bulongàme?” Bàvwa bafwànyine. . . Bikèngela twikale nè balongeshi. Ncyà bushùwà.

<sup>22</sup> Kàdi kabìvwa bikèngela bwà wèwè kwikala nè muntu nànsha umwe. . . Kabyèna bikèngela bwà kukulongeshabò bàmba nè: “Wèwè kwèndi masandi to; kùdicipi to, nè kwangaci. . .” Abi’s nukàadi babìmanyè. Kondo kèèbè mene kàà mwoyi kàà Nyumà Mwímpè kàdi kàkwambila nè mbibì bwà kwenza nànkù.

<sup>23</sup> Kàdi mpindyewu bwà bìdi bitàngilà dilongesha dyà mu Mifundu, bìdi bikèngela dilaaba dyà Nyumà Mwímpè. Ncyà bushùwà. Nè Nzambi mmutèèke Èkèleeziyà mu bulongàme ku bàpostòlò nè baprófetà, nè mapà à dyondopa, nè bishimà, nè bikwàbò. Yèyè wàkatèèka Èkèleeziyà mu bulongàme nè kutèèka balongeshi nè bikwàbò mwómò amu bwà kulombola nè kuludika Èkèleeziyà Wèndè. Nènkù mu dindà emu, twètù, bu mutwàmbi, Yesù pa buloba bu Mubidi Wèndè. . . Nènkù ànu mùdi mubidi Wèndè ùnyunga, mbyènze ànu mùdi mundidimbi kampàndà wùleejiibwa pa buloba. Newütentemukè naawù.

<sup>24</sup> Mpindyewu, bantu bààbùngi. . . Ba-Adventistes bàdi bìtabuuja nè pàdi muntu ùfwa bwà nè ùdi ùbwela buludì mu lukità nè ùshàalamù, musùukà, mubidi, nè bikwàbò byònsò, too nè ku dibìikà dyà ku lufù. Nè byàbò. . . Bàdi bàbìikila aci nè “musùukà mmulààle tulù.” Èè, abi’s mbímpè. Bìdi ànu bímpè pàdìbò bìtabuuja Yesù Kilistò nè balediibwe cyàkàbìdi apu, aci kacyàkubènzela bwalu bubi to. Kàdi mpindyewu, bilondèshile Mifundu, bwà nè pàdi muntu ùfwa, yèyè mwikàle mwena Kilistò, yèyè mulediibwe cyàkàbìdi, muujiibwe tètè nè Nyumà Mwímpè, kabyàkukèngela bwà yèyè kwimana mu cilumbulwidi cyà Nzambi nànsha. Nwamònu anyi? Yèyè ùdi ùya buludì too nè mu Bwikadi bwà Nzambi. Nè kabyàkukèngela bwà kwikalayè ku cilumbulwidi to, bwalu yèyè ùkaadi mumanè kupitakù. . . Nwamònu anyi?

<sup>25</sup> Kabyèna bikèngela bwà mêmè kulumbulula bwà cikaadi Kilistò mungenzèle to. Mpindyewu, mêmè mvwa ngènzàmpèkààtù, kàdi cilumbulwidi cyà Kilistò. . . Cintu mu kaabujimà ncyôci eci—ncyôci eci mu tuumèyi tukesè emu: Nzambi wàkamba nè: “Ditùkù diwàcidya, ditùkù adi udi ufwa.” Aci’s cyàkakòsa bwalu.

<sup>26</sup> Mpindyewu, bikèngela bwà Nzambi àshaalè mukwàte ku Dîyi Dyèndè. Yèyè kèna mwà kwenza cingà cintu to ànu kulama Dîyi Dyèndè, bwalu Yèyè udi Nzambi. Èè dîbà adi, Yèyè kèna mwà kucyènta to. Dîbà adi, Yèyè. . . Udi mutàpùlùke nè Nzambi. Kùdi. . . Nènkù dîbà adi, udi mulediibwe mu mpèkaatù, mufwimba mu bubì, mulwè pa buloba mwikàle wamba mashimi. Pa nànkù paùdi ulediibwa, udi ngènzàmpèkààtù ku bufùki. Pa nànkù kakwèna cintu nànsha cimwè pa buloba cyùdi mwà kwenza pa bwalu abu to. Kakwèna cintu nànsha cimwè cìndi mwà kwenza bwà kudisùngila mêmè mwinè anyi bwà wèwè kudisùngila wèwè mwinè to. Ke cidi Kilistò mutwènzèle mu Nzambi, anyi, cidi Nzambi mutwènzèle mu Kilistò. Nwamònu anyi? Kabyèna nè, èè, mbwalu ndi ngèèla *cikampàndà* meeji anyi ngènta *cikansanga* to, mbwalu Yèyè ní wàkacyènta.

<sup>27</sup> Èè mpindyewu, twètù tudi munda Mwèndè. Pashiishe kutwàla Yè manyooka à Nzambi; Wàkangata cilumbulwidi. Nè Yèyè, mwikàle kàyì mumanyè mpèkaatù to, kàyì mumanyè mpèkaatù nànsha wumwe to, kàdi wàkavwijiibwa mpèkaatù bwètù twètù. Pa nànkù bu mùdibi ànu nè wèwè udi munda mwà Kilistò, udi mudishikàmìne ku cilumbulwidi. “Pangààmòna Mashi, Nèmpicilè pamutù pèènù.” Nwamònu’s, nwamònu anyi? Ke bwalu abu. Mashi, àdi àtùpèèsha budishikaminyi.

<sup>28</sup> Mpindyewu, ngènzàmpèkààtù kacya. . . Bikèngela bwà ngènzàmpèkààtù àpicilè ku cilumbulwidi. Nè kakwàkwikala cingà cintu pa kuumusha cilumbulwidi eci to. Mbyenzè ànu bu ci—cijèngù anyi mwanzankòngòlò munyùngùlùkile buloba bujimà wà Mashi à Kilistò. Bu mùdibi ànu nè wèwè udi munda emu. . . Bu Nzambi mwà kutàngila buloba mu ngiikàdilù wabù dilòlò edi mu mùshindù mukwàbò kanà wònsò kàyì ùbùtàngidila ku Mashi à Kilistò, Yèyè ùvwa mwà kubùbùtula mu kasùnsukilà kàà kasunsa. Bivwa bikèngela kwenza Yè nànkù. Ncyà bushùwà nè bivwa bikèngela kwenza Yè nànkù. Ke mùlwalwà manyooka nànkù.

<sup>29</sup> Mpindyewu, bu, anyi, pàdi ànu muntu mwab’ewu, nànsha byôbi nè muntu awu mmukwàciki wa maalà, nè munayi wa twartà twà mfrangà, nè mwena bupidyà wa ùkwàcisha bwôwà, luse lwà Nzambi lùcidi ànu lùmufucila cibawu. Nènkù mukàji kampàndà, mmufwànyine kwikala, cyònsò cidiye mufwànyine kwikala aci, ndumbà kampàndà anyi ní ncinyi cyònsò, Mashi à Yesù Kilistò àcidi ànu àmufucila cibawu. Kàdi mu kasunsa kàdi musùukà wèndè wùmuka mu mubidi ewu nè ùya dyàmwàmwà, mmusambùke luse mubwele mu

cilumbulwidi. Nzambi ùkaadi mumanè kuwùlumbulwisha. Aci nciköse bwalu. Bwendè mbutùuke. Ùkaadi mulumbùlwishibwe. Ùkaadi mulumbùlwishè. . .

<sup>30</sup> Udi udilumbulwishila wèwè mwinè ku mùshindù wúdi utàngila difuta dyà cibawu dyà Nzambi, mwaba awu, bwà mpèkaatù yèbè. Nwamònu anyi? Udi udilumbulwisha wèwè nkààyeèbè. Kwéna wela meeji nè Yèyè *mmwakàne* bikùmbàne byà kukufwila luse to. Nwamònu anyi? Wèwè wela meeji nè Yèyè neàkufwilè luse, ùtonda bilèmà byèbè, nènkù Yèyè neàkufwilè luse.

<sup>31</sup> Pashìshe ku Nyumà umwe (mònaayi's) nkutùdi bònso babàtìjìbwe mu Mubidi wùmwè. Nènkù ànu mwàkabìshìibwà mubidi awu kùdi Nzambi amu, mubìshìibwe ku bafwè, mubingìshìibwe, musòmbe ku cianza Cyèndè cyà dyàbalùme mu bukòlè nè butàmbe bunène mu Dyulu, bwà aba bàdi bafwè mu Kilistò, bàdi mu Kilistò, nè badìshikàmìne ku cilumbulwidi, nè nebàpatukè mu dibìikà dyà ku lufù.

<sup>32</sup> Mpindyewu. Kàdi patùdi tufwà mpindyewu—patùdi tufwà mpindyewu apa, tudi tubwela buludi mu Bwikadi bwà Nzambi wà Bukòlè bwónsò mu mubidi wà mu dyulu. Bu mèmè mwà katwilangana nè Mwanèètù Neville kuulu kwàka, bu twètù bònso bàbidi mwà kufwà mpindyewu, mu dibà dimwè kwambwila ku mpindyewu ndi mufwànyìne kutwilangana nendè; Ndi mufwànyìne kwamba nè: “Wetwàwu, Mwanèètù Neville,” kuyiikila nendè. Ncyèna mwà kumulabula ku cianza to; yèyè ùdi mu mubidi wà mu dyulu. Ndi mwà kuyiikila nendè; ùdi mwà kwikala ne mmwènekèlu ànu udiyè nendè ewu. Ndi mwà kwikala ne mmwènekèlu ànu ùndì nendè ewu. Kàdi tudi mwà kuyiikila muntu nè mukwèndè, kàdi katwèna mwà kulengangana muntu nè mukwèndè to, bwalu katwèna nè nànsha cimwe cyà ku byumvwilu bìtaanu byà lumono, lulabulu, lulengu, lununku, nè luumvu to. Nwamònu anyi? Kàdi tuvwa bafwànyìne kwikala katùyì tufwà to, nè tuvwa mwà kumòngangana muntu nè mukwèndè. Tudi bafwànyìne kusòmbela mu bipaapu bibènèshìibwe ku cyoshelu cyà Nzambi. Kanwènaayikù bamanyè nè Yone wàkamòna misùùkà yìvwà mwìnshì mwà cyoshelu yèla lubilà nè: “Too nè dibà kaayi, Mukalenge, too nè dibà kaayi” bwà kwalukila pa buloba bwà kuvwàdikiibwapù?

<sup>33</sup> Dìbà adi, pàdi Yesù, udi munda mwètù mpindyewu mu mmwènekèlu wa Nyumà Mwìmpè awu, pàdi mubidi Wèndè wà mu dyulu, Nyumà Mwìmpè awu, wàlukila nè mubidi mutùmbishìibwe awu, netwikalè batùmbishìibwe pàmwe Nendè nè mu difwàngangana Nendè. Nudi bumvwè cìndi muswè kwamba aci anyi? Pashìshe nèmmlabulè ku cianza ngàmbe nè: “Ki bwalu mbòbù ebu's, Mwanèètù Neville.” Pashìshe netùdye.

<sup>34</sup> Tàngilàayi. Yesù wàkambila bayiidi Bèndè, munkaci mwà

kwangata Mèèsà àbò à Mukalenge, Yèyè nè: “Neyàkudyà kàbìdì tumuma twà mvinyò etu to too nè paNgàatùdyà nè kutùnwa neenù cyàkàbìdì mu Bukalenge bwà Taatù Wanyì.” Neyà bushùwà anyi? Nwamònu anyi? Ke bwalu abu’s. Pa nànkù, tudì. . . Pàdì mufwè ùfwa. . . Muntu mubingishìibwe, mwimàne mu Bwikadi bwà Nzambi, ùdì ùbwela mu Bwikadi Bwèndè bu muntu udi kàyì ùfwa to nè mwikàle nè mwoyi mu bipaapu bibènèshìibwe byà ditalala too nè ku ditùkù dìdì. . . didiye wàlukilà.

<sup>35</sup> Mpindyewu, kùvwa cikondo cìvwa bantu kabàyi bayè mu Bwikadi bwà Nzambi to pàvwàbò bàfwa, babingishìibwe abu. Aci’s cìvwa mmu Dipungila Dikùlukulu. Bàvwa bàya mu mwaba wùvwà wùbìikidiibwa nè Mpàlàdiizò, nè mwòmò amu misùùkà yà baakàne yìvwa mindìle mu Mpàlàdiizò. Kàdì Mpàlàdiizò ùvwa mwaba wùvwà Nzambi mulàmine misùùkà byenze bu mu buloba bwà cilòòtà, too nè pàakeediibwà Mashi à Yesù Kilstò panshi; bwalu mashi à bimpàngà byà ngombe nè à mbùji kaàvwakù mafwànyìne kuumusha mpèkaatù to, àvwa ànu àbwikila mpèkaatù cyanààna. Kàdì Mashi à Yesù àdì ùmusha mpèkaatù.

<sup>36</sup> Nudi numòna nè Èndè. . . pàakafwàYe ku Kàlvaryò. . . Nènku mu dyalukila Dyèndè, Yèyè kupatuka mu nkita nè bansantu bafwè abu bàvwà bafwè mwìnshì mwà difuta dyà cibawu dyà mashi à bimpàngà byà ngombe, nè à mbùji, nè à nkùngùlù yà ngombe. Ke kubwelabò mu cimenga (kaa!) nè kumwènekèlabò bààbùngì. Cimfwànyì cilenga kaayipu’s wè! Kaa, bu twètù mwà kucizòla bwà katanci kakesè cyanààna. Tàngilàayi Yesù pàakafwàYe apu.

<sup>37</sup> Mwab’ewu, ànu múnkaadi mwambàmbe misangu yàbùngì, ngèèla meeji, mu èkèleeziyà emu nè, kùdì bu mu—mu mulongo mwaba ewu, munwemu emu mmùdì bantu bàà cifwàkà basòmbèle. Nè muntu yònsò ùdì mu cinkutunkutu mwùyòmbelà cinène cyà masànkà eci, cyà mifitù nè mìdìmà. Bantu bàà cifwàkà mbasòmbèle munwemu. Mpindyewu, bàdì bàpeta bwenzeji anyi bwà bùfùmina *eku*, anyi bwà bùfùmina *kwàka*. Kwèna mwà kwikala mwaba ewu kampàndà wa nyumà, ngènzàmpèkàatù anyi munsantu, kùyì upeta bwenzeji kampàndà bwà mwìnshì mwà buloba anyi bwà mu dyulu to. Wèwè nè bwenzeji bwà mwab’ewu, udi wa ku dyulu. Mubidi wèbè wà mu dyulu wùdì munkaci mwà kwindila kuulu eku. Kàdì wèwè mwikàle mwena lwonji, nè mwena lubombo, nè kùyì ucyùka myanda to, mubidi wèbè wà mu dyulu awu wùdì mwìnshì emu, nànsha wèwè wela meeji nè wùdì kuulu aku bishi; bwalu mamuma àudì ukwàma kumpàlà kwà bantu àdì àjaadika kùdì mufùmìne. Pa nànkù cyùdì apa eci ke cyùdì mwaba kampàndà mukwàbò awu. Nsòmbelu wèbè ùdì nendè pànu apa ùdì ànu munkaci mwà kuleeja cidi bumpyànyì bwèbè paùmuka pànu apa. Nùmvù anyi?

38 Patùdi twakula mene apa tudi (kaa, pândi ngèèla meeji ku cyôci aci) tudi mpindyewu mene batumbishiibwe mu bwikadi bwà Nzambi, beena kwitabuujja balediibwe cyàkàbìdi. “Bwalu ntenta wa pa buloba ewu yèyè munyangùke, tukàadi nè mukwàbò mwindile mu Butumbi,” kî mmu mukwàbò mwaba to, ànu dyàmwàmwà ùkaadi munkaci mwà kwindila mpindyewu. Nènku mibidi yà pa buloba eyi yitwatwa mikèmu bwà kuvwàdikiibwa nè dibènga-kufwà adi. Ncyà bushùwà anyi? Bubèèdi, nè ditwà dyà mikenyi, nè bisaamà, nè dyediibwa dyà mâyi ku makàsà, nè màsaamà à myoyi, nè. . . Kaa! Nèngùikalè nè disànka piikalà nzùbu wa kale wa beena cikupi awu mukàngiibwe, kî mmwòmò anyi? Èyowà’s, mukalenge! Tudi mwà kwalukila Kumbèlu. Ncyà bushùwà.

39 Tudi ànu, tudi, tutwà mikèmu bwà kwikala balwàcishiibwe, Nyumà ngudi munkaci mwà kutwà mikèmu. Kaa, paùdi utàngila nè umòna bisaamà byònsò abi bikunyungùlùkile, cinkùtunkutu mùyòmbelè cyònsò aci, cimpèpèmpè, nè mpèkaatù, nè mwoyi wà cifwàkà, nè diseeswishangana, nè bikwàbò byònsò, ndi ndyàmbidila nè: “Kaa, Nzambi, necishaalè too nè ku dîbà kaayi’s?”

40 Dimwè dyà ku matùkù àdì panshì aa nényiishè diyiisha dyànyì dyà ndekeelu, nèndekelè Bible ewu panshì mùshindù ewu, nè ngàalukilè Kumbèlu. Kaa, neciikale cikondo kaayiipu’s wè! Nènku pààjikà bwalu bwà ntentà wa pa buloba ewu kaaba aka, kakwàkwenzeka kasunsa kàjimà nciyi mudisangàne mu mukwàbò wà dyàmwàmwà awu to; ke munwikala pèènu. Kaa, ekèlekèlè! Kabyèna bikèmesha to pààkambàbo nè:

Mùzàbì wà musunya ewu nèngùmàcishe, nè  
mbiikè,  
Bwà kubàkula difutu dyà kashidi,  
Nè ngèèla mbilà pândi ngènda mpicila mu  
lupepèlè apu.

Bushùwà, munkaci mwà kwenda kuya muulu.

41 Mpindyewu, aci cidi penyi? Ndìbà kaayi ditùdi tucipeta? Mpindyewu’s wè! “Aba bàdiYe mubingishe, Yèyè wakabàtumbisha kàbìdi.” Nènku nudiki nujingulula nè mibidi yètù mitumbishiibwe, yidi kayiyi yifwa ayi mmindile mu Bwikadi bwà Yesù Kilistò patùdi twakulangana apa, mitwindile bwà twètù kulwa anyi?

42 Nutukù bamanyè nè, pàdi mwànà ùlediibwa pa buloba apa, kumpalà kwà kupàtukayè munda, ùdi nè mwoyi, kàdi kî mmwànji kupàtuka munda to, nènku pàdi ànu mwànà awu ùlwa dyàkàmwè ku wèndè. . . ùtwàdija ku. . . ùlediibwa. . . bisùlùsùlù byèndè byònsò mmbipàte, nè yèyè’s mmufwè, misunya yèndè yidi munkaci mwà kukanka nè kuzakalala, kàdi cintu cyà kumpalà, cidi ànu kaadipi kakesè anyi túbìdi cyanààna [Mwanèètù Branham ùdi ùtuutakaja byanza—Muf.] nùnkù ewu,

nè yêyè “*neelè nyàshì’s!*” kubàkula mweyelu wèndè. Mbwalu kaayi abu’s? Pàdi ànu mubidi wa mu bufùki awu munkaci mwà kufwìmbiibwa munda mwà maamù, kùdi mubidi wà nyumà mwindile bwà kuwàkidila ànu pàdi mwànà awu ulediibwa apu.

<sup>43</sup> Nènkù ànu mùdìbi bushùwà nè mubidi wà nyumà ewu wùdi munkaci mwà kufwìmbiibwa, kùdi mubidi wà mu bufùki mwindile bwà kuwàkidila pàdìwu ànu wùpàtuka mu buloba ebu. Nwamònu anyi? Cyanza mwandamuna, mwalùkile cyàkàbìdì ku Edènà (nwamònu anyi?), mwalùkile buludi.

<sup>44</sup> Mpindyewu mwómò amu, Nzambì. . . Mòna nè lufù, aci cidi ànu—aci cidi ànu cipàtula kalonda kònsò kàà lufù kàdiku aku. Nènkù kabyèna bikèmesha to pàvwà Pòlò mwà kwimana nè kwamba nè: “Lufù, kalonda kèèbè kàdi penyì? Lukità, bucimunyi bwèbè bùdi penyì?” Yèyè nè: “Twasàkidila kùdi Nzambì udi utùpèèshila bucimunyi ku Mukalenge wetù Yesù Kilistò.” Èyowà’s, mukalenge. Ntentà wa pa buloba ewu yèyè munyangùke tukàadi nè mukwàbò mwindile, pa nànkù pwàkù wèwè ànu mwoyi bwalu abu.

<sup>45</sup> Mpindyewu bwèbè wèwè, mulundà wanyì, wèwè mwikàle ngènzàmpèkààtù udi mukonkè eci nùnkù, Nzambì ìkalèku neebè luse. Èyowà’s, mukalenge! Kwèna ànu mu dipiilla mpindyewu to, kí ng’apa to, to! Neütantè nè neütungunukè. Nè byònsò nku luse lwà Nzambì. Abi byònsò nku luse lwà Nzambì kùdi utanta nè wenza cyùdi wenza aci. Aci’s ncilelèlè. Kàdi dimwè dyà ku matùkù aa, wèwè mwikàle ngènzàmpèkààtù nè musùkà wèbè mudifindè muyè, newùye too nè cilumbulwidi nè newùpiishiibwè. Nè pashìishe, newimanshiibwè, nè newikalè mu dikèngeshiibwa too nè ku ditùkù dyàkwalujàbo cyàkàbìdì pa buloba ebu. Nènkù neùpetè mubidi wà kawùyì wùfwa, mubidi wà kawùyì wùfwa wùdi kawùyì mwà kufwà to, nè newèdiibwè mu mìdimà yà pambèlu mwikalà myadi, ditwà dyà mikèmu, nè disumakaja dyà mènù. Newèdiibwè mu ìfernò, mùdi misànda kayiyi yifwakù to anyi kapyà kakàyi kàjima to, nènkù neükèngeshiibwe munda mwà bikondo byònsò bicìlwalwà abi. Yesù ngwàkamba nànkù. Ke cimfwànyì cifiike ncyòci aci, kàdi ncidì Bible mwámbe.

<sup>46</sup> Piiikalàbi nè Nzambì wàkatàmba kupiisha mpèkaatù nè kwenza nè àyiilè musinga bu nànkù, nebiiikale cinyì bu nyumà mibì ayi mwà kwikala milekèlèdiibwe cyàkàbìdì? Tudi bafwànyine kwikala nè cikwàbò cintu bu mutwàkadì naaci munda mwà bidimu binunu bìsambòmbò byà ndekeelu ebi. Ncyà bushùwà anyi? Kakwàkwikalakù kàbìdì mpunga to.

<sup>47</sup> Mpindyewu wèwè udi wamba nè: “Èè, mèmè ndi ngiitabuja nè paùdì uya mu lukità udi—udi uya mu ìfernò.” Mubidi wèbè wùyaaya mu ìfernò, ncyà bushùwà. Ìfernò mbwena kwamba nè “ditàpuluka.” *Lufù* mbwena kwamba nè “ditàpuluka.” Pàdi mubidi wèbè wùfwa, wùdi wùtàpuluka. Udi uumuka

kùdì bananga bèbèbè pànwapa, kàdì kî ng'aci citùdì twamba to. “Mbilongolwela muntu bwà kufwà musangu wùmwepele, pashìishe paanyimà pàà aci, ncilumbulwidi.” Nwamònu anyi?

<sup>48</sup> Mpindyewu, paùdì . . . byòbì bikèngela bwà wèwè kupicila ku cilumbulwidi cyà Nzambì, neùlumbulwishiibwè kùdì Nzambì wa ciijì cikalè. Nè Nzambì neikalè mwà . . . ùkaadi mumanè kwamba cìvwàYe nè cyà kwenza. Pa nàнку udi mumanyè cìikalà dinyooka dyèbè kumpàlà mene kwà wèwè kufikakù. Pa nàнку cintu cyà dyenza nkwikala musùngìdiibwe nè kwikala nè buumuntu butùmbìshiibwe ebu . . .

<sup>49</sup> Tàngilàayi. Byòbì bikèngela bwà mèmè . . . pìikalàbi nè nyumà wanyì . . . Tàngilàayi, katwèna cintu kampàndà cifwè to; tudi nè mwoyi. Bu—bu wànyì . . . bu cibàsà eci . . . bu dibaya edi diikàlè nè mwoyi mu dyòdì wùdì mu munu wànyì, cibàsà aci, nè cìvwa nè lungènyì kampàndà bwà kucinyungisha, cìdì mwà kunyunga mùdì munu wànyì wùnyunga amu. Twètù katwèna benza nè bintu byà mùshindù awu nànsha. Tudi benza nè—nè—nè—nè tubùlù twà mashi, nè mwoyi, nè tujilujilu; nènku kùdì nyumà mwaba ewu udi ubikòntonona byònsò. Kàdì tàngila ànu mùshindù wùdiwu wèna lwendu nè lùbilu lukolè. Tàngila kùnweku; cyanza cyànyì cìdì cilenga cyòci aci. Mpindyewu, ànu mu cità nè cità . . . Bikèngela kwikalè dibinduluka dimpè nè dibi. Pàdì ànu munu wànyì wùlenga cyòci aci, wùdì wùcyùmvwà. Nè lùkàsà lwònsò cìyaaya mu meeji ànyì, nè meeji ànyì àmba nè: “Cìdì nè mashìka,” nè cyàlukila cyànyimà. Nudi numòna lùkàsà lùdici naalù anyi? Nè lùkàsà lwònsò kutàmba meeji, nè lùkàsà lwònsò kutàmba ní ncinyì cyònsò, ke cyenzedi cìdì mwaba awu. Ncinyì aci's? Kùdì cintu kampàndà ciikàlè nè mwoyi munda amu, nè kajilu aku kàdì kàkwàta mudimu mu meeji. Nudi búmvwè cìndì muswè kwamba aci anyi? Kajilu kàdì kàcilenga, kàcyùmvwà, nè kàmbila meeji nè: “Kùdì mashìka.” Meeji àmba nè kùdì mashìka, bwalu mbacyùmvwè kùdì kajilu aku. Kaa, ekèlekèlè! Nwènù bàambambà bwà mutùdì benjiibwa's.

<sup>50</sup> Nè pashìishe, byònsò abi . . . Mùshindù mwinè wùdì Nzambì ùmanya lùkàsà meeji ònsò atùdì twela awu's. Byònsò bitùdì twenza, Yèyè mmubimanyè's.

Nàнку pàdì mwena kwitabuuja ùfwa, ùdì ùbwela mu Bwikadi bwà Mufùki wendè, Nzambì wendè. Nè ngènzàmpèkààtù, pàfwafwàye, ùyaaya kwèndè kumulongolwela. Pashìishe ku dyalukila . . . Mpindyewu, ndi ngààkula mpindyewu bwà Basungula.

<sup>51</sup> Kàdì kùdì bàmwè bààbiikà mu dibiiikà dyà ku lufù diibìdì, biikala mwà kwimana ku Cilumbulwidi nè ngènzàmpèkààtù, bwà kulumbulwishiibwa nendè. Ndi muswè kwikala mutwishiibwe bwà kuumvwija cyòci aci. Nwamònu anyi?

<sup>52</sup> Mpindyewu, nekwikalè . . . Cyàkumpàlà cìikalà mwà kwenzeka neciikalè di—dilwa dyà Mukàjì-musèla. Nekwikalè

bantu pa buloba...Ndi...Nudi bafwànyine kupangakana ndambù nè eci, kàdi tèlejàayi nè ntèma. Ànu bwalu udi mwitàbe Kilistò bu Musùngidi wa sungasunga, aci kacýena cyùmvwija nè uyàaya mu Dyambwibwa to. Aci's mbwà Basungula, bàaya mu Dyambwibwa. Nekwikalè bàshàadilè pa buloba apa biikalà mwà kupicila mu dikengeshiibwa nè mu Dikènga dinène. Èkèleeziyà neàmbwibwe mu Dyambwibwa.

<sup>53</sup> Mbùngi kaayi bwà bakàji mwab'ewu bàdi kabàyi bamanyè nè paùdi uswa kukosa cipese cyà cilàmbà udi wadija cilàmbà aci panshi mùshindù ewu, nè utentekapù citembelu cyèbè aci mùshindù ewu, nè ukòsa cilàmbà bilondèshile citembelu aci? Kí mmwòmò anyi? Nè bikwàbò byònsò bìdi bishààla ku cilàmbà abi bìdi ànu cilàmbà cyà mùshindù wùmwèwùmwè nè bìdi mu citembelu aci. Kí mmwòmò anyi? Kàdi's cyà mùshindù ewu ke cyùdi wangata. Udi mufwànyine kucitèeka ku luseke bwà kukwàta naaci mudimu kumpàlà kwà matùkù, kàdi ci—cilàmbà cyùdi mukòsèlekù aci. . .

<sup>54</sup> Mpindyewu, udi utèeka citembelu aci nganyi? Nzambì, ku disungula. Amen! Nzambì ku disungula ùdi ùshikika citembelu aci. Yèyè nè: "Mpindyewu, ndi musungùle kumpàlà kwà difùkà dyà dyulu nè buloba...Ndi ntèeka aba..." Mòna's, Yesù wàkambila bayiidi nè Yèyè ùvwa naabò, nè Yèyè wàkabàsungula, nè mubàmanyè kumpàlà mene kwà difùkà dyà dyulu nè buloba kwenjiibwadi. Ncyà bushùwà anyi? Nàнку Nzambì ùdi ùtèeka citembelu aci. Mpindyewu, nekwikalè Musungula wàya mu Dyambwibwa. Nènku nekwikalè kasùmbù kàà bantu bàdi bimpè, bajaalàme, nè nsòmbelu wa cijila, bantu basùngila kùdi Nzambì, bààpangila kuya mu Dyambwibwa; nènku nebàbiike mu dibiishiibwa diibidi, bwalu. . .

<sup>55</sup> Kaa, ndi—ndi ntekemena nè kanwàkumfiikilakù munda to bu mèmè ànu mwà kunùtòokeshilakù cintu kampàndà mwab'ewu's. Nwamònu anyi? Kanwènji nàнку to. Bikèngela bwà mèmè—mèmè ncyàmbè, bwalu ndi. . .cidi ànu citùngùnuke nè kungenzeja (nudi numòna anyi?) bwà kucyàmba. Tàngilàayi's. Mpindyewu tàngilàayi. Pashiishe, nèngàmbè nùku ewu: Kùdi bantu bàdi biitabuuja dibingishiibwa ku diitabuuja (nwamònu anyi?), nènku bàdi nè nsòmbelu mwimpè, mukezùke, wa cijila; bàdi kabìdi biitabuuja dijidiibwa, bàpeta. . .

<sup>56</sup> Tàngilàayi Yudaàsà Mpongoloki awu. Yudaàsà Mpongoloki wàkabingishiibwa pàvwàye mwitàbùùje Mukalenge Yesù Kilistò nè muMwitàbe bu Musùngidi wèndè sungasunga, Yudaàsà Mpongoloki awu. Yudaàsà Mpongoloki wàkajidiibwa mu Yone 17.17 nè wàkapèeshiibwa bukolè mu Maatàayi 10 bwà kupàtuka nè kwipata baadémons. Ke Yudaàsà Mpongoloki kwalukilayè, paanyimà pàà yèyè mumanè kwondopa babèèdi nè kwipata baadémons, nènku kwalukilayè wènda ùsàнка nè wèla mbilà nè mwèndè mwònsò bu munsantu mubùnguluki wa mu malaba kanà wònsò unùkaadiku bamòne ewu. Mmwòmò anyi? Ke

mùdi Bible wàmba's. Kàdi pàakafikàye ku Mpenta, wàkaleeja civwàye. Mpindyewu tàngilàayi nùmonè nyumà awu—awu.

<sup>57</sup> Kùdi bantu pa buloba leelù ewu, beena Kilistò bìmpè bìikalà mwà kwitabuuja dibingishiibwa, bààbùngì bàà kùdìbo, binunu, mìliyò bàdì bìtabuuja dibingishiibwa. Kàdi bwà dijidiibwa kadyàkubàmbila bwalu to. Tudi bafwànyine kwamba nè ke ba-Presbytériens, ba-Épiscopaliens, nè bakwàbò. Bàdi bìtabuuja dibingishiibwa; bàdiyiisha. Kàdi's mbìmpè; mbabinge's.

<sup>58</sup> Kàdi mpindyewu, ba—ba-Nazaréens, ba-Pèlerins de la Sainteté, ba-Méthodistes Badishikàmine abu bàdi bàbwela mu dijidiibwa. Bàdi bìtabuuja dijidiibwa. Ànu mu dyòdi menemene! Bàdi mu bulelèlà. Nè bàdi bàpeta bucìmunyi, nè bèèla mbilà, nè bàtùmbisha Mukalenge. Bàdi mu bulelèlà; mbabinge's. Kàdi akùlakù nè umwe wa kùdìbo bwà dibàtiiza dyà Nyumà Mwìmpè, nè bwà bukòlè, nè bimanyinu, nè maalu à kukèma, nebàleejè cidìbo ànu mwaba awu mene. Bàdi bàmba nè: “Ncyèna muswe nànsha cìmwè cyà ku byòbì abi to. Ncyèna ngitabuuja. . .” Èè, nànsha mene ba-Nazaréens bàanyi bananga, bàdi bìtabuuja nè muntu ùdi wàkula mu myakulu ngwa dyabùlù. Nènku, mwanèètù, udi wenza nànku, udi . . .

<sup>59</sup> Mòna's, bààkiipata Docteur Reidhead mu Sudan Missions, mfùmù wabù mene, nè mbwalu wàkaakula mu myakulu. Bòbò nè: “Katwèna mwà kwikala naayi to.”

<sup>60</sup> Mèmè nè: “Dìbà adi kanwèna mwà kuyiisha bu Pòlò to. Kanwèna mwà kwitaba Èvànjeeliyò wa Pòlò to, bwalu Pòlò mmwàmbe nè: ‘Kanùkàndiki dyakula dyà mu myakulu to.’” Ncyà bushùwà. Kàdi bòbò—bòbò bàdi bàmba nè mbyà dyabùlù. Mbamònè mone ditentula bùngì cyanààna, nè bàtèeka byònsò ànu mu mulongu awu. Nwamònu anyi? Kàdi ki èkèleeziyà mubingishiibwe nè mujidiibwe awu; kàdi kuvila nè dibàtiiza dyà Nyumà Mwìmpè mmudimu mushiilàngàne nè dijidiibwa. Kàdi cidi—cidi mmudimu mushiilàngàne. Ncyà bushùwà nè mmùdìbi.

<sup>61</sup> Kùvwa bintu bisàtù byàkafùmina mu mubidi wà Kilistò. Nè bintu bìmwèbìmwè abi byàkafùmina mu mubidi Wèndè ke bitùdi tukwàta naabi mudimu bwà kubwela mu Mubidi Wèndè. Kùvwa màyi (mmwòmò anyi?), Mashi (mmwòmò anyi?), nè Nyumà. Nènku Yesù, Mufundu awu mmwàmbe nè: “Kùdi bàsàtù bàdi bàfìla bujaadiki mu Dyulu, Taatù, Mwànà, nè Nyumà Mwìmpè. Bàsàtù aba bàdi Umwe; bàdi Umwe. Kàdi kùdi bisàtù bìdì bìfìla bujaadiki pa buloba; kabyèna umwe to,” ùdi wàmba nè: “kàdi bìdì byùmvwangana bu umwe: Màyi, Mashi, nè Nyumà.” Ncyà bushùwà anyi?

<sup>62</sup> Mpindyewu, kwèna mwà kwikala nè Taatù kùyì nè Mwànà to. Kwèna mwà kwikala nè Mwànà kùyì nè Nyumà Mwìmpè to, bwal- . . . kàdi udi mwà kwikala mubingishiibwe kùyì mujidiibwe to. Nènku udi mwà kwikala byònsò bibìdì mubingishiibwe nè mujidiibwe kàdi kùyì ànu nè dibàtiiza dyà

Nyumà Mwîmpè to. Nwamònu anyì? Aci's ncilelèlà. Aci's ke Mufundu. "Bisàtù ebi," mwàkambàye, "bìdì bìfila bujaadiki pa buloba, mâyì, Mashi, nè Nyumà; kàdì bìdì byùmvwangana mu umwe." Nwamònu anyì? Kabyèna umwe to, kàdì bìdì byùmvwangana mu umwe, bwalu n'Nyumà umweumwe awu mu cipiminu kampàndà. Nzambì ùdì ùtùpa Nyumà mu cipiminu kampàndà.

<sup>63</sup> Mpindyewu, Luther, mu dibingishiibwa, ke cyàkayiishaye ncyôci aci. Mmwômò anyì? Luther wàkayiisha nè: "Mwakàne neikale nè mwoyi ku diitabuuja." Nè yêyè's wàkadì nè mukenji munène. Nènku aci's cìvwa nciùpà cyà Nyumà Mwîmpè. Pashìishe Luther, pààkapàtukà mukenji awu, Nzambì ùvwa nè cyà kùjuula Èkèleeziyà Wèndè nè kuMupàtula mutàmbe bunène (kaa, ekèlekèle!), Luther kwambayè nè: "Kaa, tudi twitabuuja nè tudi Nèndè kaaba aka."

<sup>64</sup> Kàdì John Wesley wàkamba nè: "Kaa, to!" Yêyè nè George Whitefield nè bakwàbò abu, bàakamba nè: "Tudi twitabuuja dijidiibwa, nè, didi mudimu musungùlùke mwibìdì wà ngàsà." Ncyà bushùwà anyì? Ke kuyiishabo Mashi. Èè, bu nè Luther kàvwa muswè kuntentemuka to, Nzambì wàkawùpèèsha ànu ba-Méthodistes bàà ba-Wesléyens. Nwamònu anyì? Nènku bàvwa naawù. Nè bàvwa nè ditàbuluja dyàkatangalakà buloba bujimà, nè Èkèleeziyà mulelèlà.

<sup>65</sup> Èè, mpindyewu, pàdì cikondo aci cìlwa...Mpindyewu, pashìishe kulwakù cileejì cyà Nyumà Mwîmpè cyà bimanyinu, maalu à kukèma, nè bishimà. Mpindyewu, Wesley kí mmuswe kwitaba eci to. Mpindyewu, bu nè Wesley ùvwa pa buloba nè Martin Luther ùvwa pa buloba mu bikondo ebi, bàvwa mwà kwitaba aci, kàdì bàvwa ànu nè njila mwibìdì wa ku njila yinaayi anyì yitaanu yikaavwà bàpostòlò bapicilemù, nè bàkaavwa ànu bamanè kucilòba cyònsò nè bukòndò.

<sup>66</sup> Mpindyewu, beena Mpenta bààkapeta nè bààkiitabuuja dyakula dyà mu myakulu. Pashìishe kucìvwiabò "cileejì cyà mbangilu," nè bantu bònsò bàvwa nè cyà kwakula mu myakulu. Aci's ndipanga. Kàdì mpindyewu—mpindyewu bàdì bààlukila...Abi's bìvwa bimanyinu bifidiibwe kùdì Nzambi. Ànu mûndì ncìyì nè cyà dyenzamù emu, bwalu ndi nè mèsù à bleu, anyì...Nzambì ngudi uàfila ànu's. Aci's cìdì ànu mmapà mu Èkèleeziyà. Nzambì ngudi muàtèèkemù. "Nzambì mmutèèke mu Èkèleeziyà..." Nwamònu anyì?

<sup>67</sup> Mpindyewu. Kàdì pààkalwàbò nè cyòci aci...Mpindyewu, bàvwa nè dibènesha dinène, bayè kule menemene nè ba-Luthériens anyì nè ba—ba-Méthodistes, ewu anyì ewu. Nènku mpindyewu, bàkaadi badyènzè bulongolodi mu mùshindù wà nè bàkaadi babì kutàmbe nè ba-Méthodistes anyì bakwàbò, beena Mpenta abu's. Ke pashìishe, kufikabò mu mùshindù wà nè cipingu ciibìdì nè ciisàtù...Kùkaadi bidimu bitwè ku

makùmi ànaayi kacya ànu bààbanga kupeta dyakula dyà mu myakulu. Kàdi mucì wà Nzambi ewu wùdi nè mamuma citèemà mashiilàngàne ku wòwò. Mpindyewu, dyònsò dyà ku mamuma aa udi mwà kudìpeta's. Nwamònu anyi? Nzambi ngudi muàtùme, kàdi ònsò àdi àpàtukila mu mucì awu.

Mpindyewu, dibingishiibwa, ditàngilaayi.

<sup>68</sup> Tàngilàayi dileesònà dyà mu dindà emu edi. Pààkakùtuka Cilumbulwidi, nè mikàndà yàkabuuludiibwa...Mpindyewu, Yesù wàkalwa nè binunu dikùmi misangu binunu dikùmi byà bansantu, nènku ke pashiishe Cilumbulwidi kukùtuka. Ke bòbò bònsò aba banyùngùlùkile Cilumbulwidi cyà ku Nkwasa Mutòòke (bu mutùvwà bacimòne mu Mifundu amu's), nè mikàndà yàkabuuludiibwa; nè Mukàndà mukwàbò wàkabuuludiibwa wùvwà Mukàndà wà Mwoyi. Nè aba bàvwà mu Dyambwibwa ke bàvwa bàbàlumbulwisha. Ncyà bushùwà anyi? Aba bàkaavwà bayè Kumbèlu nè bapetè mibidi yàbò mitùmbìshiibwe ayi, nè bàakasòmbela mu Bukalenge bwà bidimu cinunu abu, bàvwa kaaba aka mu Cilumbulwidi cyà ku Nkwasa Mutòòke, munkacì mwà kulumbulwisha abu's. Yèyè mmwàmbè nè Úvwa mwà kutàpulula mìkòòkò nè mbùji.

Mpindyewu, wèwè udi wamba apa nè: "Mòna's, mpindyewu tàngilàaku." Wèwè udi wamba nè: "Aci ncibànde. . .Ndwà penyì piinè apu, Mwanèètù Branham?" Mu Cilumbulwidi cyà ku Nkwasa Mutòòke.

<sup>69</sup> "Kàdi bìshi mu Dyambwibwa?" Èè, mu cikondo cyà Dyambwibwa...Yesù wàkalongesha aci bu lusumwinu. Nè Yèyè wàkacilongesha mishindù yàbùngì mishiilàngàne. Mùshindù wùmùwèpelè ngwòwò ewu. Wàkamba nè kùvwa baavirgò dikùmi bàakapàtukà bwà katwilangana nè Mukalenge. Nènku bàmbè...Bònsò bwàbò bàvwa baavirgò, kàdi bàmwè bàvwa nè Maanyi mu myèndù yàbò nè bàmwè bàakalekela Maanyi àjika. Ncyà bushùwà anyi? Nènku pàvwà Mukàjì-musèla...Mpindyewu, Maanyi awu àvwa ncinyi? *Maanyi* àvwa n'Nyumà Mwimpè; ke mùdi Bible mwambè. Mpindyewu tàngilàayi. Bàvwa baavirgò. Mpindyewu, *virgò* mbwena kwamba cinyi? "Wa cijila, mukezuke, mutàpùlùdiibwe, mujidiibwe." Ncyà bushùwà anyi?

<sup>70</sup> Bu mèmè mwikàle nè kaa verre kakesè mwaba ewu mvwa mufwànyine kunùleeja cidì...Kaaba aka, cileejilu bu mùdi mulangì ewu kaaba aka, bu nè wùvwà munda mutupù, nè mèmè kuwàmbula, kàdi mwikàle nè manyaanu èbè à tuyaayi tükamòne...Mèmè pàanyi nswa kukwàta naawù mudimu. Èè mpindyewu, cintu cyà kumpàlà cindì muswè kwenza n'Dibingishiibwa. Ndi ngwàmbula bwalu ndi muswè kukwàta naawu mudimu. Ùdi ne bukooyà; mvwa muwùsangàne mu—mu cikùmbì cyà ngulube, anyi kwònsò kùvwàwu aku. Mpindyewu, mèmè mwikàle muntu wa mùshindù mujaalame, èè, ncyèna

muswè kwelamu cintu kampàndà cikezùke to cidi cikèngela bwà mémè kukwàta naaci mudimu. Bikèngela bwà mémè—mémè kwanji kulongolola cintu aci kumpàlà. Mpindyewu, cintu cyà citàmbe bwimpè cyà dyenza nkucikezula, kucisukula, nè kucijidila. Ncyà bushùwà anyi? Mpindyewu, mwàkù *kujidila* mbwena kwamba cinyi? “Musukula nè mutèeka ku luseke bwà mudimu.” Mabùngù à mu ntempèlù wa kale awu akasukudiibwa nè kuteekiibwawu ku luseke bwà mudimu.

<sup>71</sup> Mpindyewu, ke Èkèleeziyà nyèye awu: Nzambì wàkabàmbula mu cikondo cyà ba-Luthériens, dibingishiibwa; Cikondo cyà Wesley, Yèye wàkabàjidila; nè mu eci cikondo Yèye ùdi ùbùja. Nwamònu anyi? Yèye ùdi ùtèeka Mwoyi munda mwàbò. Nè piikalà eci, Mwoyi Wèndè ku Nyumà Mwimpè. . . Nyumà Mwimpè ngwàkabàmbula; Nyumà Mwimpè wàkabàjidila; Nyumà Mwimpè wàkabùja. Nwamònu anyi? Cyònsò cidi ànu Èkèleeziyà umwèumwè awu.

Kàdi tàngilàayi mpindyewu. Mpindyewu mu ditùkù edi. . .

<sup>72</sup> Mpindyewu, ndi ngèèla meeji nè Luther, Wesley, nè bònsò bwàbù abu, bàabùngi bàà kùdibo nebàye mu Dyambwibwa. Bàwva nè citùpà cyà Nyumà cyàkayiishiibwa kùdibo; bàakaciitabuuja.

<sup>73</sup> Mpindyewu, mu Dyambwibwa. . . Kùdi bantu leelù ewu bàakaya mu màngumba awu bàwva kabàyi batùngùnùke to. Cidi. . . Kùdi ànu dingumba òmwèpelè, didi Èkèleeziyà wa Nzambì; nènu Yèye’s mmutentèmùke ànu mùshindù wùmwèwùmwè awu. Kàdi malongolodi aa mmakosolole bintu ebi mùshindù awu’s. Nè bantu bàabùngi leelù ewu nebàtangilè ku dibàtiiza dyà Nyumà Mwimpè kàdi bàmba nè ndukutukutu. Kàdi nànsha nànkù bóbò mbabingishìibwe; nànsha nànkù bóbò mbajidiibwe. Kàdi bóbò bàdi bàmba nè: “Kaa, aci’s ndukutukutu, bintàkanyi abi.”

<sup>74</sup> Ndi mumanyè nè dyabùlù ùdi nè bifwèbè byà mishindù yònsò. Ke mwaba wùdi usangana pomme yà mimpè, mmu nyungùlukilu mùdi usangana cifwèbè amu’s. Ncyà bushùwà’s. Tùngunukà wèwè ànu nè kuya kabwela paanyimà pàà cintu aci, nda ùkadyè pomme ayi’s. Nwamònu anyi?

<sup>75</sup> Mpindyewu, eci. . . Pashiishe Nzambì ùdi ùja tètè nè Nyumà Mwimpè. . . Pashiishe Yèye kutèeka Èkèleeziyà Wèndè kuntwaku bwà kuMutumbisha. Ku Dilwa diibìdi, ke Èkèleeziyà ulwàlwa mwàlùkile ewu, Mukàji-musèla ewu. Mpindyewu tàngilàayi. Mònaayi ní bàdi bàpicila mu Cipungu cyà Dikènga dinène. Yèye nè: “Baavirgò aba, bóbò kulwa kwamba nè: “Tùpèshaayiku Maanyi ènu awu.”

“Mubàki ùdi ùlwa!” Dìyi kupàtukadi nè: “Mònaayi, Mubàki nyàwù ùlwa. Pàtukàayi nukatwilàngàne Nèndè.”

Nè baavirgò aba, bàwva baavirgò, bàà cijila, bajidiibwe (anji elàayi meeji pa bwalu abu), bantu bàà cijila, bajidiibwe kabàyi

dibàtiiza dyà Nyumà Mwímpè to, bàakamba nè: “Tùpèèshaayikù Maanyi!”

<sup>76</sup> Ke Èkèleeziyà kwambayè nè: “Tudi ànu naawù ndambù mukumbàne bwètù twètù. Nwènù ndàayi nùsambile.” Kàdi díbà dikaadi dimane kupita piinè apu. Pa nànkù, Èkèleeziyà wàkabwela mu Dibàkà, nè bakwàbò aba bàakeediibwa mu mîdimà yà pambèlu (mmwômò anyi?), kùvwà myadi nè mikèmu nè disumakaja dyà ménù aku; nènku kupìcilabo mu dikèngeshiibwa amu, kukènga, kufwàbo.

<sup>77</sup> Yesù wàkaalukila pa buloba. Bukòokeshi bwà Bukalenge bwà bidimu cinunu kutwàdijabù, bidimu cinunu pàmwè Nendè. Ke ba—baakàne nè babì kjuukabò. Nè kulumbulwishaBò muntu yònsò. Nè mbùji yivwa ku luseke lùmwe nè mikòòkò ku lukwàbò luseke. Nènku díbà adi Nzambì kulwa nè kjuuulaYè Èkèleeziyà mu bwalàbàlè bwà buloba bwà kwenza masangisha à ma citùdilu, mwaba wutùdi tudisangishila bónsò pàmwe nè bananga bèètù. Nwamònu anyi? Ke dishiilangana ndyòdi adi.

<sup>78</sup> Mpindyewu, bantu aba kaaba aka . . . Cyà bushùwà patùdi tufwà, twètù biikàle mu Kilistò Yesù, tudi tuya bwà kwikala nè Mubidi munènè awu kuntwàku, Kilistò Yesù. Twètù biikàle bangènzàmpèkààtù, tudi tuya bwà kwikala nè mubidi munènè wà beena bupidyà awu; nènku Nzambì mmwàmbè nè cyètù citùpà civwa nè beena lubombo, nè bikwàbò, mu ifernò. Amen! Pàmwàpa bidi mwà kwikala kabìyi bitòòkèshìibwe menemene to.

Kàdi, tùmònàayibi mpindyewu ní tudi mwà kujandula . . . Ànu katùpà kakesè kàà kabèji cyanàànà kafùnda kaaba aka.

**16. Bu wèwè mwà kuswà umvwijàku Ekèsòòdè nshapità wa 24 . . . nshapità mwi4 ku mvensà wa 24. Mufùndu ewu wùdi wùmvwija cinyi—bwà nè Nzambì ùvwa muswè bwà kushebeya Mòsà anyi mwanèndè wa balùme awu? Kàdi mbwà cinyi?**

<sup>79</sup> Tudi bamanyè mwaba ùdici, Ekèsòòdè 4.24. Ke lukonko lwímpè ndwòlò alu. Mpindyewu, mwab'ewu netùcibale mwab'ewu mene katancì kakesè aka. Ekèsòòdè 4 nè 24:

*Nènku byàkenzeka mu njila wa ku mwaba wàkalàalàye awu, nè MUKALENGÈ wàkatwìlangana nendè, nè kukeba bwà kumushipa.*

Mbanganyì bàdi bavùlùke bwalu-bulonda abu? Mpindyewu, Nzambì wàkapèèsha Abraham, nkòngo kumpàlà kwà Mòsà kwikalakù, cimanyinu cyà ditengudiibwa. Nènku aci civwa ncipungidi civwà Nzambì mwenzè, cyà nè bìvwa bikèngela bwà mwena Yudà yònsò àtengudiibwè. Ncyà bushùwà anyi? Bivwa bikèngela bwà muntu yònsò kwikalayè . . . Aci's civwa ncimanyinu.

80 Kàdi tudi batengùdìibwe leelù ewu anyi? Nè Nyumà Mwímpè, kî nku mubidi to.

81 Mpindyewu. Mpindyewu, Nzambì wàkafila dìyì ditùma edi nè: “Nè mulùme yònsò ùdi nè cyà kutengudiibwa.” Nènku Nzambì, pààkabiikilàYe Mòsà bwà kupwekayè kuntwaku nè kusungila bàna bàà Izalèèlà, Mòsà kàvwa mwenze pa mwanèndè wa balùme awu, cimanyinu mene cyà disungila aci to. Nudi bùmvwè cìndi muswè kwamba aci anyi?

82 Mbifwànyine kwikala bu mèmè ngàmba nè: “Nwènú bònsò èkèleeziyà mpindyewu, muntu yònsò wa kunùdi—kunùdi ùbwela nè ùbàtijiibwa kaaba aka mu màyi, nènku tudi tukubweja mu buumambàla bwà èkèleeziyà. Tuyààya bònsò mu Butùmbi pàmwè.” Mòna’s, mwanèètù, aci kî m’Mufundu to. Paùdi kùyi muledìibwe cyàkàbìdì to, mutengùdìibwe kùdi Nyumà Mwímpè. . . Bikèngela wikalè nànkù. Nànsha wèwè mwímpè wa bìshi, nànsha wèwè wa mu èkèleeziyà kaayi, baledi bèèbè nè bàvwa bímpè bàà mùshindù kaayi, wèwè kùyi bu muntu—nkààya muledìibwe cyàkàbìdì kùdi Nyumà Mwímpè to, kwàdyàkuyakù mu Dyambwibwa to. Nwamònu anyi? Kwèna mwà kuya to. Ke cimanyinu mene cyà disungidiibwa ncyòci aci, ditengudiibwa; nè ditengudiibwa didi nku Nyumà Mwímpè. Mpindyewu Nzambì. . .

83 Mwedi wa—wa lukonko mmukonke nùunku ewu: “Mufundu ewu wùdi—wùdi wùmvwija nè Nzambì ùvwa nè kiipàcìlà kàà kushipa Mòsà anyi mwanèndè wa balùme awu anyi? Kàdi mbwà cinyi?” Nzambì ùvwa ùdimbatangana nè Mòsà. Nè Sèforah ke uvwa umwèpelè wakamusungila kuntwaku. Bwalu Sèforà wàkangata dibwe ditwisha, nè kuya, nè kukòsayè musòsò wà mwanèndè, nè kuwìmanshayè kumpàlà kwà Mòsà nè kwamba nè: “Wèwè udi mulùme wa mashi bwànyì mèmè.” Ncyà bushùwà anyi?

84 Nènku Nzambì ùvwa mufwànyine kwikala mwangàte mwoyi wà Mòsà, kàdi pàmwàpa Mwanjèlò ùvwa mwimàne mwaba awu, kwambayè nè: “Sèforà! Enza bwalu abu lùkàsà!” Nwamònu anyi?

85 Nènku Sèforà kuyayè è kutengula mwànà awu. Yéyè nè: “Mòsà, bùdì butàmbe—butàmbe kukutonda mbwà bintu bikwàbò nè bwà lwendu lwèbè, mu mùshindù wà nè mwanèèbè wa balùme sungasunga kènà mutengula to.”

Ntu ànu ndikonka misangu yàbùngì ní. . . Míngà misangu ntu mutwilàngàne nè bantu bàtu bambè nè: “Kaa, butùmbi kùdi Nzambì’s wè. Mukalenge mmuswè bwà mèmè kwenza cintu *kampàndà*. Mmuswè bwà nye ku Àfrikè, ku Inde.”

86 Mèmè nè: “Ukààdikù mukonkè musùmbishi wa mabèèle ní ùvwa musungidiibwe anyi? Ukààdikù kacya mukonke musùmbishi wa bibèjibeji ní ùkaadikù mene muledìibwe cyàkàbìdì anyi? Kàdi bishi bwà mwena mutumba neebè

awu's, mmusùngìdìibwe anyi?" Nwamònu anyi? Mpindyewu, ke lukonko ndwòlò alu. Nwamònu anyi? Cyôci mu mwoyi wèbè. . .

<sup>87</sup> Mwab'ewu kùkaadi cikondo kampàndà muntu mukàji kampàndà kutwilanganayè naanyi mu Floride emu. Nè mukàji mukesè awu, ncyèna nè mùshindù. . . Ncyèna mulumbulwishi to. Kàdi kùvwa muyiishi mukesè uvwa mwaba ewu mene nè wàkayiisha pa cibùmbà cyà ku cyambilu eci. Nè mukwètù mukesè ewu mu ditùnga dikwàbò ùvwa musèlàngàne nè mwikàle nè mukàjèndè, bânà basàtù anyi bànaayi. Nè mukàji ewu ùvwa mukàji mukàmbà. Nènku bàvwa bafùmìne ku Texas, pàmwè balwè kaaba aka mu kàshinyi kanène kàà Cadillac. Nènku mukàji ewu kubwelayè. Nè ùvwa nè bukenji bwà kulwàtayè mùshindù wònsò wùdìye muswè awu, kàakangenzelakù cintu nànsha cimwè to; kàdi bu mukàji mwena Kilistò yèyè kàvwa mulwàte mùshindù awu to. Yèyè ùvwa (kaa, ekèlekèle!), ùvwa. . . wàkadi yà mile minène menemene. . . bikànu byà ku maci (mwònsò munùdì nucibìikila amu) bilembèlèlè mùshindù ewu, nènku wàkadì nè mushikì mujimà wà—wà bintàkanyì pa mishikù yèndè; nè—nè—nè makikì èndè àvwa makòsa nè ùvwa nè makwàbò makikì, menza nè crayon, pambidi. Ke yèyè nè: "Mwanèètù Branham," yèyè nè, "Mukalenge nyèwù ùmbiikila ku ditùnga dyà ku baabèndè."

Mémè kwamba nè: "Wambilamù anyi?"

"Èyowà's!" Ke yèyè nè: "Nyààya kuntwaku nè muntu mulùme ewu."

Ke mémè nè: "Èè, pìikalàbi nè Mukalenge ùdì ùkubìikila, èè, mbìmpè." (Kàdi ku mamuma àbò. . . Kabìvwa bìmwèka bìmpè menemene kùndì bu mùdì. . . Nwamònu anyi?)

Ke yèyè nè: "Kwèna witabuujà nè Mukalenge. . .?"

<sup>88</sup> Mémè nè: "Mpindyewu, kùnkònkì mémè to. Pìikala Mukalenge mmukwambile, enzà cìdì Mukalenge mukwambile bwà kwenza aci. Kàdi bwànyì mémè, ncyèna ngèèla meeji nàнку to, bwànyì mémè mwine. Nèngìikalè ànu nè meeji matòòke kùdì."

Yèyè nè: "Èè, udi wela meeji nàнку bwà cinyi?"

Mémè nè: "Cintu cyà kumpàlà, wèwè bu mukàji musèla nè mulùme ewu udi pèndè musèlàngàne kabyèna bìmwèka bìmpè menemene to, nudì nushààla mu cimenga emu pàmwè. Pìikalakù cintu cìdì citwàla bundù s'ke cyôci aci. Nwamònu anyi?" Ke mémè nè: "Mpindyewu, cintu cyà kumpàlà. . ."

<sup>89</sup> Mpindyewu, ncinyì cyàkenzekela mukàji awu's? Cintu cimwècimwè aci cìvwa cìfwànyìne kwikala nè. . . Yèyè ùvwa ànu mutùngùnùke nè kulènguluka kàyì mupetè Nyumà Mwìmpè to, ànu mùvwà mukàji awu lwà kuntwaku leelù uvwa mumbiikile nè muswè bwà kusediibwa kùdì mulùme awu, nè kushiya bàyèndè sungasunga, kàdi kusediibwa kùdì mulùme awu. Úkaavwa

mubwelè mu mwaba wà, pàmwăpa musangu kampàndà mwikàlè mu dipetangana nè Nzambi, kàdi ùvwa munkaci mwà kwalakana bintu byà pa buloba. Ke mêmè kumukonka; mêmè nè: “Ukàadi mupetè Nyumà Mwîmpè anyi?”

Yêyè nè: “Ncyênà mwânji kumupeta to, kàdi ndi mMukèba.”

<sup>90</sup> Mêmè nè: “Anji petà Nyumà Mwîmpè dyàmbedi, nènku Yêyè neàkwambîlè mulùme wa kwikala nendè.” Ncyà bushùwà. Nwamònu anyi?

Udi—udi nè. . . Ke cìdiku ncyôci aci. Wêwè kùyi mumupetè to, neùfwe mu nyumà. Nzambi ùdi wènda ùkèbangana nè bààbûngi dilòlò edi, bàdiYe mukookòle ku mwoyi wàbò misangu yàbûngi. [Mwanètù Branham ùdi ùtuuta bintu pa cyambîlu—Muf.] Nè cìmwè cyà ku bikondo ebi Yêyè neàkangè ciibi, nè—nè luse lujikè. Nwamònu anyi?

<sup>91</sup> Bushùwà’s, Nzambi ùvwa mufwànyine kwikala mwangàte mwoyi wèndè. Yêyè wàkamba nè Wàkamukèba. Tèelejàayi mùdi Mufùndu awu wùbadiibwa:

*Nènku byàkenzeka mu njila wa ku mwaba wàkalàalaye awu, nè MUKALENGE wàkatwilangana nendè, nè kukeba bwà kumushipa. (Mòsà. Mpindyewu, tàngilàayi.)*

*Pashùshe Sèfòrà kwangatayè dibwe ditwè—dibwe ditwè, nè kukòsayè musòsò wà mwanèndè wa balùme awu, nè kuwìmanshayè ku makàsà èndè, nè kwambayè nè: Bushùwà wêwè udi bwànyì mulùme wa mashi.*

<sup>92</sup> Ncyà bushùwà. Mpindyewu, Nzambi kàvwa wènda ùkèbangana nè mwànà awu to. Nzambi. . .Mwànà mukèsè mukwàte nè byà luse awu kàvwa mumanyè cyà dyenza to; kàvwa mwenze bwalu to. Kàdi uvwa nè bwalu, ùvwa ntatwèndè wa mwànà, uvwa wenda upweka ùya nè mwànà awu kuntu kwaka bwà kusungila bânà bàà Izalèlèlà mwînshì mwà cimanyinu cyà ditengudiibwa; kàdi nànsha nàнку mwanèndè sungasunga wa balùme kàyi mutengùdiibwe to. Nwamònu anyi? Nènku Sèfòrà kuwùkòsayè nè dibwe, musòsò awu, nè kuwìmansha panshì, nè kwamba nè: “Wêwè udi mulùme wa mashi bwànyì.”

### **17. Bu wêwè mwà kuswà umvwijàku dyumvwija dyà Mifùndu, nè pùikalàwu mwà kwenzeka: Yeshàayi 4 nè 1. Twasàkidila.**

Èyo. Netùbuululè ànu cyanàànà mpindyewu lwà mu. . . Nwènù bàdi nè Bibles yènù nè baswè bwà, netùmonè cìdì. . . Ncivwa mupete mpungà wa kutangila cyôci eci to, kàdi mwà ndyàmbidila nè pàmwăpa tudi bafwànyine kupeta dyandamuna dyà mùshindù kampàndà. S’ki twètù aba.

*Nènku mu. . .(Kaa, èyowà’s!) Nènku necilwe. . . Nènku mu ditùkù adi bakàji mwandamutekète nebàkwatè mulùme umwèpelè, nè nebàmbè nè: Netùdidùshe dyàmpà dyètù, nè nètùdìwàdike*

*bilamba: tûlekèle ànu tubiikidiibwe ku dînà dyèbè,  
bwà kutiùmusha bundù bwètù.*

<sup>93</sup> Èè, mwanèètù, s'bidì byamba kwikala ànu bibì mùshindù awu mpindyewu. Ncibùlà kaayi cidi cyenzekele ditunga dyètù's! Lekèlaayi ngàmbè bwalu ebu, nwènù balundà baanyi bananga beena Kilistò. Lekèlaayi ngàmbè bwalu ebu nè kaneemu kàà difwànà dyà Nzambì kùdì muntu nè muntu nè: Bu nè kùvwakù ànu. . . Nè nwènù bàdì balongè bwalu-bulonda aba, tudì ànu mu njila umwèumwè udi ditunga dyònsò dîmpè edi dipònemù munda mwà bikondo, nsòmbelu munyangùke, munkaci mwà kwalukila.

<sup>94</sup> Ànu mûngãmbì mu dîndà emu. . . Numfwilaayiku luse bwà dicyambulula. Mu matungà à ku baabèndè bantu bàdì bàlwa kùndì bàmba nè: "Mwanèètù Branham, mbakàji bàà mùshindù kaayi banùdì nwènù bònsò naabù kuntwaku? Èè, misambu yònsò yinùdì nwimba ayi, yìmwè misambu yà kale yà manyaanù bwà bakàji bèènù ayi." Ke cyòci aci. Mishindù yònsò. . . cinkùtunkutu mùyòmbelè cyà—cyà—cyà. . .

<sup>95</sup> Èè, nudi bamanyè cìdici anyi? Nwènù baswè bwà nnwãmbilèku mu ndambù wa myákù, nennwambilè ànu menemene. Buloba mbufikè mu ngiikàdilù wa mùshindù ewu, bwalu n'Sodomà nè Gomòlà byà cyena leelù. Menemene! Mu Californie ngaakangulamù cibèjibeji kampàndà. Kàdi ndi mupwè mwoyi búngì kaayi bwà binunu bìdìbo bàpeta cidimu cyònsò, bwà kumanya, byà divulgana dyà babàkyanganyi bàà balume nè balume. Nànsha dijinga dyàbò dyà mu bufùki dyà. . . pankaci pàà mulùme nè mukàjèndè, nè bikwàbò, dikaadi dilekèle bantu. Ànu menemene cyàkamba Nzambì nè necyenzeke. Nè byàbò bòbò. . .

<sup>96</sup> Udi wambula bàmwè. . . Udi umòna nè nganyì udi upeta dimanyika dyà mùshindù kampàndà. Tèèlejaayi ku cisanji cyènù, anyi ku ntèlèviziyò, anyi cyònsò cyùdì naaci, bwà kujandula. Ncyà citàmbe bubì bikolè nè cyà manyaanu citàmbe. . . Kùdì musambu kampàndà pa bìdì bitàngilà mukàji kampàndà anyi cintu kampàndà cyà mùshindù awu, ke cintu cidi cyènda luumù ncyòci aci.

<sup>97</sup> Nènku mbikafikè mu mùshindù wà bimwèka bu nè katwèna tucyùka to bwà bakàji bèètù, anyi, bakàji bèètù kabèèna bàdicyùka bòbò biinè to. Ke cidiku ncyòci aci. Bu mukàji kampàndà mwà kudilama mujaalàme, nebiikengele bwà mulùme ìkalè mujaalàme. Nè aci kî nkutwa ku cyà muntu mulùme to, kàdi ndi mumanyè nè aci mbulelèlè. Èyowà's, mukalenge! Kàdi aci ncinyi? Cidi ànu ngiikàdilù wa—wa wènza bwòwà, nè ùdì ànu wikalanganakù. Nènku eci mbilondèshile Mifùndu. Bible mmwàmbè nè nebiikalè mùshindù awu. Pa nànkù mmunyi mutùdiku mwà kupeta ditàbuluja? Mmunyi mutùdiku mwà kupeta ditàbuluja?

<sup>98</sup> Tèelejàayi, nwênù balundà beena Kilstò. Mu katanci kakesè cyanààná kàdi kanshàádile lekèlaayi nnùkonka cintu kampàndà. Tudi nè ba-Billy Grahams. Tudi nè ba-Jack Shulers. Tudi nè mishindù yònsò mishìilàngàne yà nk-waka yà ntèndeleelelu yìdì munkaci mwà kwenzeka pa buloba bujimà. Nènkummyenze nànkumunda mwà bidimu bishààle bisambòmbò anyi mwandamutekète mu États-Unis mujimà emu ànu nè lubilu lukolè nè mwàbò mwònsò, kàdi ditàbuluja nànsha òmwè. Bwà cinyi? Biibi bidi munkaci mwà kukàngika. Tudi balòbe nè makòndò mishipa nè mishipa yònsò, ànu mùndi mwàmbe mu dindà emu, bayipàtùle mu dijiba. Pàmwàpa kùcidi kushààla wùmwe anyi yibìdi milamàte mwaba kampàndà.

<sup>99</sup> Mwaba wùvwà Billy Graham mwenzè masangisha kampàndà (ngèèla meeji nè civwa mmu Boston anyi mwaba kampàndà), nènkubàvwà bàmba muvwàbò nè bantu binunu makùmi àbìdi nè byà mu njila bakùdimùne mucima mu mbingu yisambòmbò. Bààkaalukila paanyimà pàà ndambù wa mbingu kàdi kabàyikù mwà kupeta makùmi àbìdi to. Anji elàngànaayi meeji pa bwalu abu's! Mwanèètù, cikaadi pabwìpi nè kujika. Ndi mwà kwamba cintu kampàndà mwaba ewu. Nwamònu anyi?

<sup>100</sup> Tudi nè mwoyi mu matùkù àvwà Nzambì mwàmbe nè neàlwe awu. Nènkutudi nè mwoyi mu matùkù à ndekeelu. Nènkutudi nè mwoyi mu cikondo cìdi bantu. . . Nànsha citùdì tuteeta bwà kwelapù meeji ciikàle cinyi, Dìyì dyà Nzambì ndidì dyàmba nè tudi badyànjila kulongolola. Ncyà bushùwà. Nènkudi Nzambì mubiikile awu neàlwe kùdi Nzambì; nè udi Nzambì kàyì mubiikile awu kàakulwa kùdi Nzambì nànsha. Nzambì ùdi ùbiikila, kàdi bòbò bàdi bàbenga, nè Yèyè ùdi ùbiikila, bòbò bàdi bàbenga. Mpindyewu, ncyèna ngàmba nè Nzambì ùdi ùpiìsha muntu kampàndà to. Yèyè kí mmuswè ànu bwà bònsò biikalè nè cyà. . . bwà muntu nànsha umwe àbutukè to, kàdi bwà bònsò bamonè mwà kulwa ku kanyinganyinga. Kàdi bwà kwikala Nzambì, Yèyè—Yèyè ùvwà mumanyè ku cibangidilu nè kabàvwà mwà kulwa to. Kàdi Yèyè wàkabàpèèsha mpungà, kàdi bòbò kabàvwà baswè kulwa to.

<sup>101</sup> Mmuniyì. . .? Yèyè kàyì mumanyè aci to, mmuniyì mwàkamanyàYe nè tuvwa bafwànyine kwikala nè matempu à kaàyi nè tùbalù? Mmuniyì mwàkamanyàYe nè bikondo ebi mbifwànyine kulwa bu mutùdi naabi mpindyewu emu? Bwà cinyi Wàkamba nè: “Bantu mbafwànyine kwikala nè mutù mukolè, badibàndishi, banangi bàà bisankasanka”? Bwà cinyi baprófetà bònsò bàvwà badyànjila kwamba nè bintu bikwàbò byònsò ebi bìvwà mwà kulwila buludì ànu kwambwila ku cibangidilu aku? Nzambì ùvwà mumanyè byònsò. Yèyè mmumanyè ciikalàku. Nènkukùdi bantu muntwamu bàvwà Nzambì ùtàngila munda mwà cikondo nè kwamba nè: “Kabàakulwa to.” Nènkubòbò mbapiishiibwe ànu ku

dipiishibwa adi, bwalu bôbò biinè mbàvwà bacisungule. Amen!  
Ki bwalu mbwôbù abu's.

102 Nènku ndi ngiitabuujà, mwanèètù wa balùme, mwanèètù wa bakàjì (Ndi ngàmba bwalu ebu nè kaneemu nè diciinà dyà difwàna dyà Nzambi mu mwoyi wànyì), ndi ngèela meeji nè Àmèrikè mmutùkìne! Mmujiimije nsòmbelu wa bukàlàngà. Mmupwèke milongo too nè ku dishàadila. Mbyà luse be.

103 Anji elàayibi meeji mwab'ewu, pàndi ngàmba mu—mu dyandamuna dyà Mufùndu ewu apa, bakàjì mwandamutekète bàdi bàpya mulùme umwèpelè. Mu Mvità yà Kumpalà yà Buloba Bujimà. . . Mvità Miibìdi yà Buloba Bujimà. . . Ndi nè—nè citùpà cyà cibèjibeji mu nzùbu. Nuvwa badìbadileci nwènu biine. Yèyè nè: “Cidi cyenzèkele nsòmbelu mulenga wa bakàjì bèètù bàà beena Àmèrikè ncinyi? Bàsàlaayi bàbidi pa bàsàtù bònso bàvwà bayè dyàmwàmwa dyà mbù bakàjì bààbò mbashipè naabò mabàkà mu ngondo yisambòmbò yà kumpalà ayi.” Bàbidi pa bàsàtù bàvwà bashipè naabò mabàkà. Bakàjì aba bààkanyema è kuya. Bwà cinyi bìdi nànkù? Bu nwènu mwà kuumvwa, balundà bàànyì, nnyumà wa cikondo.

104 Bidi bikèngela tùbwelè mu nyumà wa matùkù à ndekeelu pàdi matùkù à ndekeelu miikàle kaaba aka. Paùdi uya mu cibambalu cyà dijà dyà maja, bikèngela ùbwele mu nyumà wa maja, cyanààna kabààkujà maja to. Paùyaaya mu èkèleeziyà, bikèngela ùbwele mu Nyumà wa dikuukwila kumpalà kwà wèwè kukuukwila. Bidi bikèngela bwà buloba bùbwele mu nyumà wa matùkù à ndekeelu kumpalà kwà matùkù à ndekeelu kulwawù, kàdi's tudi mu nyumà wa matùkù à ndekeelu. Nè Nzambi mmulayè nè bintu ebi nebiikalè kaaba aka, nènku ke citùdi naaci ncyôci aci. Tudi mu matùkù ndekeelu. Nè balùme nè bakàjì mbasòmbè mu tulù nè kabàyi bàcìjingulula to.

105 Nè nsòmbelu mulenga. . . Mvwa mutwilàngàne nè nsongàalùme kampàndà kaaba aka ditùkù adi lwà mu. . . kaa, kùkaadi cikondo kampàndà, mu movù wà mabèji àpòópoka mushààle ewu. Nènku tuvwa tubwela mu cimenga kampàndà. Nènku ùvwa ùndondela, nsongàalùme kampàndà wa citende wa mu cilongelu citùmbùke uvwa musèlàngàne. Yèyè nè: “Ndi musele mwànà wa bakàjì ewu, bwalu ùvwa mwànà wa bakàjì mwímpè, nè bìvwa bikèngela bwà mèmè kumusela kumpalà kwà kujikijayè tulaasà tubàndile.” Yèyè nè: “Katwèna bapete nànsha umwe mwikale virgò to, bwà ku dyànyì dimanya, mu dipàtuka mu cilongelu cibàndile munda mwà bidimu munwemu emu.” Nwamònu anyi? Ànu batàmbe kunyanguka ku nsòmbelu wa bukàlàngà.

106 Nènku lwà mu Californie mwàmwa, mèmè kupicila mu misèèsù mu myaba kampàndà mùvwà bampùlushi bafwànyine kunwàmbila bwà kuumuka mu misèèsù. Kùdi njiwù yàbùngì bwà muntu mulùme kupicilayè mu misèèsù kutàmba mùdibi

bifwànyine kwikala bwà muntu mukàjì. Tujila twà mídimà. Kaa, Nzambi, wáfwakù luse's wè! Kanwènàku bamanyè nè Bible mmwambè nè bintu abi bìvwa mwà kulwa anyi?

<sup>107</sup> Nènku ànu kumpàlampala kwà kufilaYè mundidimbi wàci mu Sodomà nè Gomòlà, nè kuyayè kuntwaku, cintu cimwècimwè eci kwenzekaci—cyàkenzeka, éyowà's. Ke Nzambi kutuma kapyà nè kwosha mwaba awu butùbutù. Dikunji mene dyà cimanyinu bwà kuleeja nè buloba bujimà, pàdibu bùfika pa kaaba aku, bìvwa mwà kupeta [Katùpà kàà mukàbà wà mèyi munda mutupù—Muf.] cintu cimwècimwè aci.

<sup>108</sup> Tudi ku matùkù à ndekeelu. Bushùwà's. Bakàjì mwandamutekète nebàpye mulùme umwe, bàmba nè: “Netùdye dyàmpa dyètù sungasunga nè netùvwalè bilàmbà byètù sungasunga, ùtùlekèlè ànu tubiikidiibwa ku dìnà dyèbè bwà kutùùmusha bundu.” Mwanèètù, kabyèna bìkèngela bwà wèwè kuumuka kuya kule nè Ètats-Ùnis to. Kùdi mwaba ànu wùmwèpelè wùndiku mumòne kacya bándela wùmwà ndyàmbidila nè wùvwa wà mutàmbe bubì kupita misèèsù nè bintu bìmvwà nsanganyiibwamù mu ditùnga dyètù sungasunga. Nè katwèna twenda tudyàkaja to. Tudi twenda tunyanguka ànu ku musangu nè ku musangu nè kunyanguka dìbà dyònsò. Nènku vùlukaayi nè, ndi ngàakula mu Dìnà dyà Mukalenge. Netùtungunukè ànu nè kwenda kubiipa. Kùdi ditèkemena ànu òmwèpelè ku byònsò, nè didi mu Kilistò Yesù. Cyùdi wenza nànsha ciikàle cinyi.

<sup>109</sup> Ndi mwele mbilà, muye mu ditùnga dijimà emu. Nè Nzambi's mmubiishe mene nè bafwè. Nè tudi babwelè mu bimenga; nè bantu bàvwà mu màkalù à balèmà munda mwà bidimu kujjuuka, nè bènda mu cimenga cijimà paanyimà pàà tushinyi twà bisamuna, munkaci mwà kusùkuma tùshinyi twàbò nè bintu byà mùshindù awu. Nè bakàjì, bàvwà bangàngàbukà bàmbè patòoke nè mbafwè abu, bambùle fòtò yà ku byamu byà mídimà miikàle nè dìnà dyà ngàngàbukà kumutù kwàyì aku, bàvwà babiike ku bafwè. Ke cimenga cijimà aci kusòmbaci kwamba nè: “Huh, lubùkù; musùmbà wà bansantu babùnguluki bàà mu malaba.” Kaa, kwèna mwà kutekemena cingà cintu to ànu dipiishiibwa! Kaa! Ncyà bushùwà's!

<sup>110</sup> Cilumbulwidi cidi apa, nè nebikèngelè bwà wèwè kucyàkidila. Mwanèètù, nyemà ciji cikolè cìcilwalwà aci bwà kuya kùdi Kilistò Yesù nè mwèbè mwònsò nè lùkàsà lwònsò! Pàtukà mu bintu ebi! Éyowà, nnyumà wa mu matùkù à ndekeelu. Bintu byàbùngì mbifwànyine kwambiibwa. Nèndwijakajè.

**18. Udikù mwà kuswà bwà kutwàmbila mùdi Mukalenge wetù nè Musùngidi Yesù Kilistò muswè bwà twètù kubwela mu nzùbu wa Mukalenge wetù bwà kukuukwila anyi?**

<sup>111</sup> Èyo, alu's ke lwimpè lùdiku. Alu's ke lwà musinga mukolè be bwà èkéleeziyà kanà yònsò. Nzambi mmunwindilè bwà

nwènù kulwa ku nzùbu wa èkèleeziyà. . . Mpindyewu, aci's cidi ànu lukonko, ànu lukonko lwà buludi. Kí ncyà mu Mifundu to; cidi. . . nànsha nàнку ncyôci's. Indilaayi, nênnwâmbilè cyàkambàYe. Cyàkumpalà, pawikalà muswè Mufundu, bantu bàdi nè cyà kulwa ku nzùbu wa Nzambì bwà kiipàcilà kàmwèpelè, mbwena kwamba nè dikuukwila, bwà kwimba misambu, nè kukuukwila Nzambì. Mùshindù awu ke wùdi Nzambì mwindilè kutùdi. Yèyè kèna mwindilè bwà twètù túbwelè mu nzùbu wa Nzambì bwà kwakula bwà wetù. . . anyì cintu kampàndà cikwàbò to, anyì kwakula bwà muntu nè mukwèndè, anyì kwakula bwà cidi cikèngela bwà twètù kwenza munda mwà lumingu lujimà; Yèyè mmwindilè bwà twètù kulwa bwà kuMukuukwila. N'nzùbu wa dikuukwila. "Nènkù bivwa bìkèngela bwà bintu byònsò kwenjiibwabi mu bukezùke nè mu bulongàme," mwàkambà Pòlò mu Bible. Bintu byònsò bìdi nè cyà kwikala ànu mu byòbi. Kùdi nè cyà kwikala mukenji.

<sup>112</sup> Cintu cyà kumpalà cindi mufwànyine kwamba, bilondèshile mèyi matùma à Èkèleeziyà mu Dipungila Dikùlukulu, anyì, Dipungila Dipyadipyà's wè, cyàkumpalà, bantu bàvwa bàbwela mu èkèleeziyà wa—wa Nzambì mu Nyumà wa dikuukwila. Nènkù bàvwa bàbwela, miyengà yívwa yimbiibwa. Nè pàmwàpa muyiishi awu uvwa mwà kwakula, bwalu yèyè ùvwa mupròfetà wa èkèleeziyà. (Mupròfetà wa Dipungila Dipyadipyà mmuyiishi; aci's tudi bamanyè: "Bujaadiki bwà Yesù Kilistò n'Nyumà wa cipròfetà," mwàkambà Bwàkabuulwibwà.)

<sup>113</sup> Mpindyewu, muyiishi awu ùdi ùbanga kuyiisha. Pàvwàye ùyiisha apu, mabènesha awu, ànu ku, pàmwàpa ku ndekeelu kwà diyiisha dyèndè aku, àbanga kupweka; bantu bàvwa mwà kwamba nè: "Àmen," bàtwàdija kubènesha Nzambì. Dìbà adi pàvwàye ànu wimanyika kuyiisha, kùvwa kufwànyine kwikala mukenji kampàndà wùpàtuka, pàmwàpa mu dyakula dyà mu myakulu myenyi (Kolintò wa Kumpalà 14.13,14). Dìbà adi—dìbà adi kwòkò kakùyì mwandamunyi mu èkèleeziyà to, muntu ewu ùdi nè cyà kushààla mupùwe, bwalu bàdi bàakula mu myakulu ànu mu byòbi menemene, kàdi bàdi bàcyènza kumpalà kwà Nzambì. Nwamònu anyi? Kàdi bóbò bàakula mu myakulu nè kwikale mwandamunyi, mwandamunyi awu ùdi nè cyà kufila mukenji. Èkèleeziyà yònsò yìkaadi yìkafika ku cyòci aci.

<sup>114</sup> Charles Fuller, nànsha mùvwàye mungèèle mutooyi nè mungenzèle maalu à lukutukutu pàmvwà nsanganyibwa kuntwaku, mpindyewu's ùdi munkaci mwà kuciitaba. Nènkù bàdi bàcyènza mu Long Beach. Èyowà's, mukalenge! Ànu ku mwelelu menemene wa màyi aku, ànu mu dìbàlaasà amu, biikàle nè mabènesha à Nzambì, dyakula dyà mu myakulu, dyandamuna dyà myakulu, nè disambidila babeèdi. Pènde wàkiimana kumpalà kwànyì wàmba nè: "Mwanèètù Branham, mèmè ncitu ngiitabuuja bintàkanyì abi to."

Mèmè nè: "Èè, abu's mbukutàngile. Kí mbwà beena bupidyà

to, Mwanèètù Fuller, Mbwà aba bàdi biitabuujà.” Nènku mpindyewu ùdi munkaci mwà kuyiisha cintu cimwècimwè aci. Cìdi cifika ku cikondo kampàndà; kùdi diteembangana dyà makàndà.

<sup>115</sup> Mpindyewu dîbà adi, byòbì mu bulongàme, piikalàbi nè eci ke kùdi uringa kukafika . . . Pàdi muyiishi munkaci mwà kwakula apu bivwà bikèngela bwà bintu byònsò biikale mu cinyàanyà bwà kutèeleja muyiishi awu. Bwalu ke Diyì dyà Nzambi àdi munkaci mwà kupàtuka, piikalàye ùyiisha mu dilaabiibwa. Dîbà adi, nyumà yònsò wa bapròfeta ùdi ùkòokela mupròfeta. Pàdi mpaasàtà ùbànda pa cibumbà cyà ku cyambilu, ùtèeka Bible awu panshi, bivwa bikèngela bwà èkéleeziyà ikalè mupùwe, munkaci mwà kutèeleja ku . . . dibala dyèndè dyà Mifundu, ùtèeleja ciikalàye nè cyà kwamba aci. Yèyè mwambè cintu kampàndà cyà cimwèka cimpè kùdi, udi mwà kwamba nè: “Amen, Mukalenge àbèneshiibwè!” anyì cyònsò cyùdi muswè aci. *Amen* mbwena kwamba nè “biikalè nànkù.” Bible’s ngudi mwambè bwà kwenza nànkù.

<sup>116</sup> Dîbà adi, paanyimà pàa diyiisha dimanè kujika . . . Dîbà adi muyiishi yèyè mufile mwaba kampàndà muntwamu mùdi bantu bònsò bàcyònkomoka, Nyumà munkaci mwà bantu, pàmwàpa Yèyè mmufwànyine kutùma mukenji mukwàbò. Yèyè mutùme mukenji kampàndà, newùlwe kùdi muntu kampàndà, pashiishe dyandamuna; kacyàkwikala, ànu dyambulula dyà Mufundu anyì dyà kwenza cintu kampàndà to. Nzambi kàtu ùkwàta mudimu nè dyambulula didì kadìyi nè mushinga to. Kàdi neciikalè mukenji wa buludì bwà muntu kampàndà kwenzàye cintu kampàndà anyì cintu kampàndà ciikalà mwà kwibaka Èkéleeziyà. Pashiishe pàdìbò bàpeta diibakiibwa dyà Èkéleeziyà adi, nudi nwamba . . .

<sup>117</sup> Bu mùdi cileejilu bu eci: Muntu kampàndà ùjuuka apa wàkula mu myakulu; ewu ùmwijja nè wamba nè: “EMU MMÙDÌ NYUMÀ MWÌMPÈ WÀMBA: *Kampàndà* àkatentèkèlè muntu ewu byanza lwà apa nùnkù, bwalu EMU MMÙDÌ NYUMÀ MWÌMPÈ WÀMBA, dilòlòlò edi ke cikondo cyà dyondopiibwa dyèndè.” Ncinyì aci?

Dîbà adi muntu umweumwe ewu kwambayè nè: “Mvwa musòmbe mwaba awu; mwoyi wànyì wùvwa wùlàkuka kapyà bwà mwànà awu.” Mpindyewu—mpindyewu kujuukayè mu ditumikila dyà Nyumà, kuya katentekela mwànà awu byanza, nènku’s mmusàngàle. Kabìyi nànkù to, kùdi cintu kampàndà cibi. Nwamònu’s, nwamònu anyi? Aci’s mmukenji wa buludì.

<sup>118</sup> Pashiishe mwena bupidyà ùdi musòmbe mwaba awu wamba nè: “Anji indilà kakesè. Ambà tùng, Nzambi’s ùdi nè bantu aba!” Nudi bumvwè cìndì muswè kwamba aci anyi?

<sup>119</sup> Dîbà adi nebàmbè, anyì nè: “EMU MMÙDÌ NYUMÀ MWÌMPÈ WÀMBA: Muntu nè muntu udi usanganyiiibwa mu

luseke lwà ku sud wa cimenga, lwà ku luseke lwà Mùsèsèù wà Spring alu, ùùmukèku mu matùkù àbìdì àdì àlonda aa, bwalu nekùlwe cipeepèlè cikolè cìikalà mwà kukòmba luseke lwònsò lwà cimenga alu.” Pashìishe, katancì aka anyì, cipròfetà cìfidiibwa bwà èkèleeziyà mujimà.

<sup>120</sup> Pashìishe muntu kampàndà, mwikàle nè bujinguludi bwà nyumà, ùjuuka wàmba nè: “Cìvwa cyà kùdì Mukalenge anyi?” Muntu nè muntu. Bu bantu bîmpè bàsàtù mwà kwimana kwamba, bajinguludi bàà nyumà, kwamba nè: “Aci cìvwa cyà kùdì Mukalenge,” díbà adi èkèleeziyà ùdì ùcyàkidila; nè bantu bònsò bàà mu ndekeelu wa cimenga amu bàdì bùùmuka, bàya kule naaci bwà cikondo aci. Díbà adi cyòci kaciyì cyenzèke to mbîmpè nùkenketè muntu awu. Nwamònu anyi? Nudi nè nyumà mukwàbò munkacì mwènù. Kàdì cyòci cyenzèke, díbà adi kubènesha Nzambi nè kusàkidila Nzambi bwà dinùfikisha ku dipànduka ku ciji cikolè cìvwa nè cyà kulwa aci. Nwamònu anyi? Tàngilàayi bintu abi. Ke Èkèleeziyà nyèyè awu mu bulongàme.

<sup>121</sup> Mikenji yìbìdì anyì yìsàtù, kí mmipite pa yìsàtù nànsha, neyìpàtukè musangu wùmwe mùshindù awu. Cyònsò cìdì cìpàtuka aci, nwamònu’s, cìdì nè cyà kutèekiibwa mu bulongàme. Mwaba wà kumpàlà...pashìishe, èkèleeziyà mukwàbò, cintu cikwàbò mu bulongàme... .

<sup>122</sup> Ncyèna mumanyè to. Ewu’s mmufwànyine kwikala muntu mukàji kampàndà udi mikonke eci. Ndi ànu... . Cintu kampàndà cikwàbò ncindwile mu meeji, pa nàнку mbipìciibwe nè mèmè mucyàmbè ànu’s. Bakàji abu, pàvwàbo nè cyà kubwela mu èkèleeziyà, bàvwa, bilondèshìle Dipungila Dipyadìpyà, bàvwa nè cyà kubwelamù nè kusòmba panshì nè cibwikilu kwìsù nè mmwènekèlu wa dibungama, nè bàshààla mwinè amu mu cikondo cyà disangisha cijimà aci. Aci’s mbilondèshìle Mifùndu. Mpindyewu. Kàdì ndi ngèèla meeji nè mukàji... .Bushùwà’s. Mpindyewu, ncyèna nnùpiisha nwènù bakàji to. Nwamònu anyi?

<sup>123</sup> Nsongàakàji kampàndà wa citende mmulwe kùndì kwènji katancì. Kabìyì... .Mwanèètù Junior ùvwapù mwaba awu pààkalwà mukàji kampàndà, nè ùvwa nè lutàtu kampàndà. Beena mutumba bèndè kumusekabò, bwalu kàvwa muswè kukòsa nsukì yèndè to ànu àbìdì àdì panshì aa. Ke kuyayè kakòsa nsukì yèndè. Nè pashìishe, mukàji kampàndà dyàmwàmwà dyà musulu kumubwejayè mu cibwejàkàji, nè kumwambila nè ùvwa nè cyà kwangata, mu mùshindù wà nyumà, kuswikakaja makàsà èndè nè byanza byèndè, anyì, nsukì nè wàkabweja mukàji ewu mu bwòwà. Mukàji awu kwamba kujìmija lungènyì, nè bàna bàbìdì. Kàvwa mumanyè cyà dyenza to. Ùvwa musòmbè ànu mùshindù awu.

<sup>124</sup> Dìngà ditùkù kulwayè nè mashinyì too nè mumpàlà mwà nzùbu. Nyumà Mwîmpè kutùulukayè, nè kwakula nendè, nè kumwambila nè ùvwa mwà kuumvwa bîmpè, Kwamba nè:

“Nènku EMU MMÙDÌ NYUMÀ WÀMBA...” Ke yèyè—yèyè kushààla mùshindù awu díbà adi munda mwà ndambù wa matukù, ke pashiishe yèyè... Mvwa muyè makeèlèlè awu, mvwa nya bwà kamòna mukàjì awu pàmwè nè Mwanèètù Junior nè Mwanèètù Funk. Nènku mvwa nsanganyiibwa mu ntàntà wa metèlè nkàmà mwandamukùlu nè mwaba awu. Yèyè’s ùvwa mwimàne, munkaci mwà kusàmuna nsuki yèndè yidiye nè cyà kulekela—kulekela yileepa mpindyewu ayi, kwambayè nè: “Beena mutumba ní bàdi baseka bàsekè nè bènzè cyònsò cidìbo baswè kwenza aci.”

<sup>125</sup> Kàdi pashiishe, Nyumà Mwímpè kàvwa mufwànyine kundekela nya kuntwaku to. Nènku Yèyè kwakula nendè nè kumwambila nè mvwa pabwìpì nè mwaba awu nè mvwa muswè kulwa. Nènku makeèlèlè dilòlò mu cikeenà-kumòna, mémè kumòna mukàjì awu wènda ùlwa, nè kwamba cìvwa cìmutàcisha; nè yèyè wàkondopiibwa mu cibambalu cyànyì kùkaadi katanci. Nwamònu anyì? Ncyà bushùwà anyì, Mwanèètù Junior? Ncyà bushùwà. Kùkaadi katanci. Nwamònu anyì? Nzambì kàvwa muswè kundekela nya kuntwaku to bwalu cintu aci kacìvwa cyanji kwikala pabwìpì to. Nwamònu anyì? Yèyè mmutùlùke buludì mu mwaba awu nè mucishindìke mwaba awu mene, bwà kuleeja nè kí mmuntu to, Cìvwa n’Nzambì. Nwamònu anyì?

Mpindyewu. Yèyè nè: “Mwanèètù Branham, bàyaanyì mmuswè bwà mémè kwikala nè nsuki mile.”

<sup>126</sup> Mémè nè: “Nzambì mmuswè cintu cìmwècìmwè aci.” Ncyà bushùwà, bwalu bakàjì bàdi nè cyà kwikala nè nsuki mile. Ke cyàbò cibwikilu ncyòci aci.

<sup>127</sup> Ndi mumanyè nè twètù bainábànzà leelù ewu, anyì nwènu bainábànzà, èyowà’s wè, nudi nulwàta bifulu. Nwènu nudi nwamba nè ke cibwikilu cyènu aci. Aci ncyà mashimi. Bible mmwàmbè nè cibwikilu cyà mukàjì nnsuki yèndè. Nènku yèyè mukòse nsuki yèndè ncintu cibì bwà yèyè kusambila. Ncyà bushùwà anyì? Ke Mufundu ngwòwò awu. Nwamònu anyì? Nànku mpindyewu, bakàjì bàdi nè cyà kwikala nè nsuki mile, cyùdì muswè kwela meeji pa bwalu abu nànsha ciikàle cinyì; aci’s ke cidì EMU MMÙDÌ MUKALENGE WÀMBA ncyòci aci. Wèwè udi mwà kundeeja mwaba kanà wònsò... .

<sup>128</sup> Wèwè udi wamba nè: “Èè, nsuki yànyì’s mmile. Nwamònu’s, yidi yìmpwekela nè pa makaaya.” Ayi’s yìvwa nsuki mìpì. “Kilistò... .” Wèwè wàkamba nè: “Kilistò’s uvwa nè nsuki mile.” To, kacya Yèyè kàtukù mwànji kwikala naayi to. Kilistò ùvwa nè nsuki yà yìMushìikila pa makaaya, ke mùdìbo bàmba. Bàdi—bàdi ànu bàyikòka eku nè eku mùshindù ewu bwà kuyikòsa, nsuki yà yìshìikidila pa makaaya. Tàngilàayi mwàkù wà mu cyena Ngelikà awu pa cyòci aci, nènku’s nenùjandule.

129 Nsuki yà bakàjì. . . Kabivwa bikèngela bwà muntu mulùme kwikalayè nè nsuki mile nànsha, bwalu aci's ncyà bantu bakàjì, mile mipwekele nè panshi mùshindù ewu. Kàdi's Yéyè wàkayikòsa ànu lwà pa makaaya Èndè apa, mwaba wùdìbo bàyikòsela awu, eku nè eku kwà mutù Wèndè, kuyibèbulakù ànu mùshindù ewu. Aci's cìvwa n'nsuki mîpì.

130 Pa nàнку, bainàbànzà nè nsuki yibàshìikidila pa dikaaya, yìcìdì ànu nsuki mîpì. Mpindyewu, ncyèna ngàmba nè aci ncifwànyine kukutùma mu ifernò anyì kukufikisha mu Dyulu to. Aci kacýèna naaci bwalu to. Kàdi bulongàmè bwà Èkèleeziyà mbwà bakàjì kwikalabò nè nsuki mile. Ncyà bushùwà; ncyà bushùwà. Nènku bwà kubwela mu èkèleeziyà. . . Nènku—nènku kabeenà nè cintu nànsha cìmwè cyà dyanza mu bwalu abu to, maalu à mu nsòmbelu, anyì, kí mmu. . . ndi nswa kwamba bwà maalu à myanda nè mikanda mu èkèleeziyà. Kàdi's bìdì bikèngela kwikalayè mutùmikidi, nè kaneemu, nè bikwàbò byà mùshindù awu, bwalu yéyè nguwu, mùdì Bible mwàmbè, yéyè ngwàkatwàla cibùlà cyà kumpàlà aci. Nènku aci's ncyà bushùwà; ncyà bushùwà. Mpindyewu, nè lùkàsàlùkàsà. Ndi ntèkemena nè aci kacivwa citàpe muntu ku mwoyi to.

**19. Lukonko: Bwà cinyi bivwa bikèngela bwà cìkeenà-kumòna cyà Nzambi kulwaci kumpàlà kwànyì pankaaavwà ngàmba kwangata Mèèsà à Mukalenge mu èkèleeziyà wanyì? Luseke lukwàbò. (Èè, dìnà's ndyà inàbànzà kampàndà; èyowà, dìnà ndyà inàbànzà.) Kùdì. . . Mbwà cinyi bivwa bikèngela bwà cìkeenà-kumòna cyà Nzambi kulwaci kumpàlà kwànyì pankàavwà ngàmba kwangata Mèèsà à Mukalenge mu èkèleeziyà wanyì?**

131 Èè, ncìvwa mufwànyine kumanya to, mwanèètù wa bakàjì, ambà ànu byòbì nè cìvwa eci nùnkù: Wèwè mumòne Yesù Kilistò ùmwènèka mu cìkeenà-kumòna mu èkèleeziyà wèbè amu paùvwà wangata Mèèsà à Mukalenge apu, Yéyè úvwa ùjinga kukumanyisha eci nùnkù: nè n'Yéyè úvwà wangata awu mu cimfwànyì. Mèèsà à Mukalenge nkuleeja mubidi wà Yesù Kilistò; nè wèwè uvwa uMwangata bu cimfwànyì mu mubidi wèbè. Pa nàнку ikàla nè nsòmbelu mukezùke, nè wikalè nè nsòmbelu mukezùke.

132 Tèèlejàayi. Wèwè wangata Mèèsà à Mukalenge (neùcitàèlèjè cìbadiibwa ànu mu tusunsa tukesè cyanàànà) paùdì kuyì mukùmbànyine to, udi mupìile bwà Mashi nè Mubidi wà Yesù Kilistò. Muntu àngate cisùmbù aci ikale nè mwoyi mujaalàme kumpàlà kwà Nzambi, udi wangata Mèèsà à Mukalenge, èyowà's wè, ikalè nè mwoyi kumpàlà kwà Nzambi. Kùàngàcì kuyì mukùmbànyine to. Aci cìdì ànu. . .

133 Tàngilàayi. Bible mmudyànjlè kwamba nè mu matùkù à ndekeelu nè mèèsà ònsò à Nzambi àvwa mwà kwikala mùle tètè nè bilùshì. Nè kakùvwa kufwànyine kwikala

muntu nànsha umwe mukumbàne bwà—bwà kuumvwa to. Ncyà bushùwà anyi? Tàngilàayi's. Anu matùkù mashààle aa mvwa mubwele mu tabernacle kampàndà. Ncyèna mwà kutèèla dìnà dyèndè to; nwènù bônso's nudi bamumanyè bônso bîmpè. Nudi bamanye civwàbo bangàte bwà mèèsà à Mukalenge anyi? Bàvwa bàngata mulungu wà dyâmpà, dyâmpà dyà mwoyi, dyâmpà dyà dipeepèle, nè badisùnsulula. Nè musùmbà wà balami, bàvwà muiiishi mwâmbè nè mwandamutekète mujimà bàvwa bakwàciki bàà maala. . . Ncyà bushùwà. Nénku muntu nè muntu wa kùdìbo, musùmbà mujimà awu. . . Nudi bafwànyine kubàmòna pàvwàbo bàpicila mu nzùbu amu apu bàyiikila nè bantu. Nè pààkatangalajiiwbà èkèleeziyà, ku ndekeelu, pankaci pàà kàlaasà kàà Dyàlumingu nè èkèleeziyà, pàmwè mene nè yònsò wà kùdìbo, mpaasàtà nè bônso, kupàtukabò kukanwà mfwankà pambèlu apu, nè bààlukila bàbwela bwà kwangata Mèèsà à Mukalenge. Nzambi mmwambè nè Yèyè kí mmufwànyine kunùbingisha bwà bwalu abu nànsha. “Nénku bààbùngì bàdi bàsaama nè batekète munkaci mwènù, nè bààbùngì mbafwè.” Ncyà bushùwà.

<sup>134</sup> Yèyè nè: “Mèèsà ònsò a Nzambi mmùle tèntè ne bilùshì, nè nganyi ùngààpetà mùshindù wà kulongesha dilongesha.” Yèyè wàkamba nè: “Bwalu bidi nè cyà kwikala kanungu pa kanungu, mulongo pa mulongo, nè ndambù apa nè ndambù pààpa. Shààlaayi bakwàte bikolè ku cìdì cîmpè. Bwalu ku mishìku yìdì yìkukuminà nè mu myakulu mikwàbò mmùNgààkulà nè cisàmbà eci, nènku ke diikisha dîmvwà mwâmbè nè nedìikalèku kaaba aka, kàdì nè byònsò ebi bàvwa mwà kukùpa mitù yàbò nè kukwàta njila kuya nè kwamba nè: ‘Katwàkubitèèleja to.’” Tàngilàayi mwaba wutùdì nè mwoyi, balundà bàànyì. Kaa, luse wè! Tàbulukàayi!

<sup>135</sup> Èyowà, cikeenà-kumòna cyèbè aci, Mwanèètù wa bakàjì. . . Wèwè mwikàle mukàjì mwîmpè, mukezùke, wa cijila kumpàlà kwà Nzambi, uvwa mwimàne mwaba awu nè Yesù ùvwa ùkulekela umanya nè Yèyè ùvwa ùkupèèsha Mèèsà à Mukalenge, bwà nè wèwè uvwa munkaci mwà kuMwangata muntwamu bu cîmfwànyì; nènku byòbì kabìyì nànkù to, bu didimwija kùdì bwà wèwè kuditèèka mu bulongàme nè Nzambi kumpàlà kwà wèwè kucyènza cyàkàbìdì.

**20. Ndi muswè kumanya cìdì cìdì—cìdì cilonda eci: Timòtè wa Kumpàlà, mwi2. . . Timòtè Mwibìdì nshapità mwi2 ku mvnsà wa 16.**

<sup>136</sup> Katanci kakesè cyanàànà. Timòtè Mwibìdì. . . [Katùpà kàà mukàbà wà mèyì munda mutupù—Muf.] Tudi tudisanga. Pàmwàpa kanwakupetangana nè cìndì mwâmbè to. Alùkila kwèbè kumbèlu. . . Pashìishe, nenwàlukile kumbèlu nùkalongè bikolè menemene, nè pashìishe necinùkwàcishe bwà nwènù kushààlà bàà nyumà. Eyo, Timòtè Mwibìdì 2 kùdì 16 ùdì ùbadiibwa mùshindù ewu:

*Kàdi epùkà biyìkìyìkì byà pàtupù nè dilàbakana:  
bwalu neyivudije dipangila dyà cijila dyàbúngì.*

Èyowà. Èyo, nudi baswè kumanya cidi “miyiiki yà dilàbakana” ayi’s. “Cyena dyabùlù...epùkà miyiiki yà dilàbakana, bwalu neyivudijè.”

<sup>137</sup> Mpindyewu, cintu cyà kumpalà cidi “miyiiki yà dilàbakana, bwalu neyivudijè.” Mpindyewu, cintu kanà cyònsò cidi ànu cyà kale...cidi ànu biyìkìyìkì byà dilàbakana. Bible mmwâmbè, Yesù mmwâmbè nè: “Lekèlè ‘èyo’ webè ikalè ‘èyò’ nè ‘to’ webè ikalè ‘to,’ bwalu cintu cikwàbò citàmbe eci neciifikè ku mpèkaatù.” Kanwèna nànsha nè cyà kunèka nè kwela bilèla muntu nè mukwèndè to. Nzambi neàkufikishe ku dilumbulula bwà díyi dyònsò dyà cyanààna dyùdi wakula adi. Nudi bamanyè nànkù anyi? Bible mmwâmbè nè newikalè nè cyà kulumbulula bwà díyi dyònsò dyà cyanààna. Pa nànkù bìvwa bikèngela bwà twètù kwikala bantu bàà mùshindù kaayi’s? Bantu bàà bamba bulelèlè, bàà dísù dikolè, bàà dinanga, bàà musàngelù, nè kabàyi musumbà wa lukutukutu to, misangu yònsò biikàle ànu bàtùngunuka... .

<sup>138</sup> Tàngilàayi. Angàtà muntu wàbanga leelù ewu...Nkàadi mucimònè mone pa mèmè mwinè, nè bu mudibi nè ngiikàdilù wanyi mèmè mwinè, mwena Irlandè; Mèmè ntu misangu yònsò ànu mpeta lutàtù luvulè mèmè mwinè nànsha bìshi, bwà kunèka nè kutùngunuka. Kàdi ku musangu—ku musangu nè ku musangu nànsha mene mukàjàànyi ùtu wàmba nè: “Mpindyewu, Bill...!”

Mèmè nè: “Ncyà bushùwà, Munanga wanyi.” Yèyè’s neàmbè, ntu nsàkilangana nè bânà...Mèmè kwamba...Kubànekela anyi cintu kampàndà, kwamba nè: “Èè mpindyewu, nudi bamanyè’s, kutu kupàtùke bantu banène bàsàtù mu Kentucky.”

“Bàvwa mbanganyi?”

“Èè, Abraham Lincoln.”

“Èyowà.”

“Danyèlè Boone.”

“Uh huh.”

“Nè tatwènu.” Cintu bu nànkù awu.

<sup>139</sup> Nènku mukàjàànyi kwamba nè: “Mpindyewu, Bill, ke wèwè wàtwàdiji kàbìdi awu.” Nènku bìdi bikèngela bwà mèmè kuumuka kuya mu mwaba kampàndà mubùlākàne, kwamba nè: “Mukalenge, umfwileku luse, ncivwa nè meeji à kwamba nànkù to. Ngènzèlèku cintu kampàndà; mfikishèku ku dilekela cyòci aci.” Nwamònu anyi?

<sup>140</sup> Nènku ditùkù dyònsò mèmè...mèmè mwenzè nànkù... Mpindyewu, tuvwa twakula pa mwàkù *ditwà cimpingà* mu dindà emu. Paùdi wenza nànkù udi mutwè cimpingà. Èyowà’s, mukalenge! Bikèngela ùnyingalalè. Ncyà bushùwà anyi?

Mpindyewu, ncyêna muswè kwamba nè udi mupàtuke muyè mu maalu àa pa buloba nè udi mwenze *cikampàndà* nè *cikansanga* to, kàdi udi mwenze cintu kampàndà. Bikèngela ùnyingalalè nè ùfwe ku ditùkù nè ku ditùkù bwà kwikala nè mwoyi mu Yesù Kilistò. Pa nànkù ku musangu wònsò, ku ditùkù nè ku ditùkù, ditùkù dyònsò, bìdi bikèngela bwà ùfwe ditùkù dyònsò bwà kwikala nè mwoyi mu Kilistò Yesù.

<sup>141</sup> Pàndi ngèza cintu kampàndà... Misangu yàbùngì ntu ngèza bintu bìdi bibì. Pàndi mpatuka, nè muntu kampàndà wàmba cintu kampàndà anyi cikansanga, ndi mwà kwambakù ndambù wa bilèlè pa bwalu abu. Muntu kampàndà wàmba... Kì ncyà cibi to; mpindyewu, mèmè ncyêna ngiitabuujà nè beena Kilistò bàtu bènza minèkù yà bundù to. To, mukalenge! To, mukalenge! Abi kì mbikùmbànyine nànsha beena Kilistò to, Bible ngudi mwambè awu. Mmwàmbe bwà kubenga bintu byà kale byà cyena dyabùlù byà mùshindù awu, nè kwela bilèlè, nè kunèka, nè bintu byà mùshindù awu. To, beena Kilistò kabàtu bàmba bintu abi to; beena Kilistò bàdi nè meeji makezùke.

<sup>142</sup> Kàdi wèwè kùyi mutàngile bìmpè to, ku musangu nè ku musangu neupete muntu kampàndà... Yèyè neàteelè ndambù wa bilèlè leelù ewu. Nènku mbîmpè, yèyè ùvwa wèela meeji bu nè bìvwa bìmpè, nè neàcilekèlè ànu cìya nànkù, kàdi kàyi wèela kàbìdi meeji bwà bwalu abu to. Ditùkù dìdì dilonda udi ulonda tuubilèlè tukesè túbìdi. Nwamònu anyi? Nènku cintu cìdì cìlonda nudi bamanyè's, udi munkaci mwà kwenza cintu kampàndà cikwàbò. Nènku katanci aka anyi, cìdi cyàlukila cyàkàbìdi buludì ku ndongolwelu umwèumwè wa kale awu. Ncyà bushùwà anyi? Shààla kule nè cintu aci. Cyèpùke's! Nè epukà biyikiyiyiiki byà cyena dyabùlù abi.

<sup>143</sup> Nuvwa bùmvwè muntu kampàndà mulwè kuntwaku... Nènnùpèeshè ànu kaacilejilu kakesè. "Mandamu Doe, udi mumanyè mùdi bwalu anyi? Mèmè's nkàadi mumòne bàyeebè. Nènku ndi nzwàmabila mùdi bwalu. Nè yèyè's mmulami." Nwamònu anyi? Nènku... .

Mpindyewu, ànu cintu aci, kwamba nè: "Ncyêna muswè kucitèeleja to!" Ncyà bushùwà, nènku tùngunuka nè kuya. Kwàkwenza nànkù misangu mipitèpìte bùngì to, nè yèyè neàcilekèlè. Ncyà bushùwà.

<sup>144</sup> "Kaa, udi mumanyè mùdi bwalu anyi, Mwanèètù wa bakàji? Nènkwanbilè cyàkenzekelà Mwanèètù wa balùme." Kì ng' ànu mwanèètù wa bakàji nkàayendè to, kàdi mwanèètù wa balùme yèyè pèndè. Nwamònu anyi?

"Mwanèètù, nènkwanbilè cyàkenzekà. Nudi bamanyè nè bu twètù mwà kutòndoka ànu muyiishi awu, bu twètù mwà kwenza *cikampàndà*, anyi kutòndoka mulami ewu, anyi bu twètù mwà kwenza *cikampàndà*." Kaa, kaa! Ànu—ànu epukà ànu cintu aci.

<sup>145</sup> Ngèèla meeji nè cintu cikesè cîmpè cidi cikèngela bwà nwênù kutèeka cinyùngùlùkile ntooyi wènu, nkaacintu kakesè kândi mumòne mu Floride emu kí nkwânjì kwenza ntàntà mule to. Cìvwa ntuunsokù tukesè túsàtù; nènku kàmwè kàà ku tótù kàvwa nè byanza byàkù pa mèsù ààkù, bwà kwamba nè: “Kùtàngidi bubì to”; nè kakwàbò kàvwa nè minu yàkù mu maci ààkù, kamba nè: “Kùtèèleji bubì to”; nè kakwàbò kàvwa nè cyanza cyàkù citèeka pa mishiku, kamba nè: “Kwàkudi bubì to.” Ndi ngèèla meeji nè aci ncintu cîmpè, kí mmwòmò anyi? Èyowà’s, mukalenge! Kaa, ekèlekèle! Aci’s ncintu cîmpè cyà dikèma.

<sup>146</sup> Shààla wèwè ànu nè meeji èbè makezùke nè pa Kilistò. Kwèna ànu mwà kwamba nè: “Èè, mpindyewu. . .” Mpindyewu nwamònu’s, wèwè kùyì mutàngile bìmpè to, neùdyèlè mu mwaba kampàndà, wèwè mutùngùnùke ànu nè kwela meeji awu. . . Nènku kùteeci—nènku kùteeci kwela meeji nè udi nè. . . Kwèna mwà kwikala nè nsòmbelu mupwàngàne mu mùshindù wà kùyì wenza ntùpàkànyì ayi mpindyewu to. Mpindyewu, kwèdikù meeji nè neùfikè ku diikala mùshindù awu to, bwalu kwàkufika to. To, mukalenge! Wèwè kwèna mupangè kwikala nè mpèkaatù to, nènku ncyà bushùwà nè neùpambuke mu njila, ku elu luseke nè ku lwàlwa luseke.

<sup>147</sup> Kàdi muntu kampàndà utukù mudishinde, yèyè mwikale mùsàlaayi mulelèlè neàjuuke cyàkàbìdì. “Mukalenge, ndekèlaku njuukè nè ntètè cyàkàbìdì.” Kàdi muntu mutulùmùke, pàdìye ànu umòna nè ùdi wenza cilèma cyènde cikesè cyà kumpàlà aci, ànu mùmvwà mwàmbe mu dindà emu amu nè: cìshiishi nè ntànde wa mu màyi neàlandapuke àlukile buludì kàbìdì mu màyi. Nwamònu anyi? Yèyè kèna ànu mwà kucitwàla to.

<sup>148</sup> Pa nànkù bènga biyiikiyiiki byà cyena dyabùlù byà kale—abi nè lukutukutu, miyiiki. *Biyiikiyiiki* mbwena kwamba nè “ncimvundù.” Nè Bible mmwàmbè nè: “Twàkù citàmpì pa aba bàdi bàfila makòkyanganyi munkaci mwènù.”

<sup>149</sup> Muntu yèyè mwàmbe nè: “Uh huh! Uh huh,” mpindyewu amba ànu—ànu nè: “Wetwàwu? Ndi nè disànkà dyà kukumòna cyàkàbìdì. Twasàkidila.” Kàdi tungunuka ànu nè kuya kumpàlà. Aci’s ke cintu citàmbe bwîmpè. Kubeepùkì to, kàdi ùbàdìmùkìlè. Kùtùmikù ntèmà nànsha yà kànà to, bwalu udi umòna kùdici cikafikisha.

## **21. Yesù ùvwa ùfùmìna penyì ku Wendè. . . Yesù ùvwa penyì kuumukila ku dibàtiiza Dyèndè too nè mu bidimu bisàtù byà mudimu Wèndè wà bwambi awu?**

<sup>150</sup> Èyo. Yesù, pàakabàtiijiibwàYe, wàkapàtuka buludì mu màyi amu, nè Nyumà wàkaMulombola mu cipèèlè munda mwà matùkù makùmi ànaayi à muunya nè à bufùku bwà kuteeciibwa kùdì dyabùlù. Nè Yèyè wàkateeciibwa matùkù makùmi ànaayi à muunya nè à bufùku. Nènku Yèyè kujila byàkudyà. KuyaYè kuntwaku. Dyabùlù kuMuteetayè pàakapàtukàYe paanyimà

pàà dijila Dyèndè dyà byàkudyà. Nènku Yèyè kukàndameena dyabùlù ku Dìyì dyà Nzambi, nè kubwela mu mudimu Wèndè wà bwambi, nè kuyiisha Yè bidimu bìsàtù nè citùpà, bilondèshile Mifundu.

<sup>151</sup> Tàngilàayi. Kale wàwa mu Danyèlè Nzambi wàkaakula nè kwamba nè Ùvwa mwà kuyiisha bidimu bìsàtù nè citùpà nè kushipiibwa bu Mulàmbù mu ciinè cikondo aci. Ànu menemene. Kwambwila ànu ku difùkà dyà dyulu nè buloba Yèyè ùvwa mudyànjila kulongolola. Ncyà bushùwà.

<sup>152</sup> Maatàayi nshapità mwi4, nenùsanganè cyôci aci. Cyôci kaciyi ànu menemene bilondèshile diitabuuja dyèbè to, mbîmpè.

Mpindyewu, bwà elu ncyèna...Tùmonebi cidi...Kaa, èyowà's. "Mpenyi pàdi...?" Tuvwa balwangàte kwènji katanci. "Bafwè bàdi penyi?"

## **22. Mu cikondo kampàndà—mu cikondo kampàndà twètù bônso aba twakadi batòoke anyi bafiike? Ku bàbidi abu, nganyi uvwa mwediibwe mulawu?**

<sup>153</sup> Mpindyewu, bwà ku dyètù pèètù dimanya, ncìvwa mwà kunwambila nè Adàmà nè Evà bàvwa—bàvwa batòoke, anyi bafiikùlùke, anyi bàà kàlaabi, anyi bafiike to. Ncyèna mwà kunwambila to. Muntu mukwàbò nànsha umwe kî mmumanyè to ànu Nzambi nkàayèndè, ngèela meji; Yèyè ùvwaku kale wàwa. Mpindyewu, mu...Bu mutùdi tufùmina bônso ku mwakulu ùmwè nè cisàmbà cìmwèpelè too nè ku cibùmbà cyà Baabelè, cibwejàkàji. Nènku dìbà adi myakulu yàbò yàkashiilangana. Nènku bwà ku dyètù dimanya bàvwa bônso cisàmbà cìmwèpelè too nè cikondo aci. Nènku kwabulukabò nè kumwangelaka mu bitùpà bishiilàngànè byà buloba.

<sup>154</sup> Nènku bàmwè...Paùdi wangata nyama kampàndà; paùdi wangata mwoyi kanà wónso wùdi wùdiilà kùdi buloba kampàndà awu, newùkudimukè mu diikala adi. Kwòkò cilembi kaaba aka, ùndondè ànu mu tusunsa tukesè cyanààna. Ndà mu Mexique, ùkawkwàtè mubwàbwà; ùbande mu Arizona emu ùkwatè mubwàbwà; ùbandè mu Nord mwàmwa ùkwatè mubwàbwà wùmwèwùmwe awu, kàdi ùtàngile meekala àsàtù awu. Angàtábi Lombe wa mantadi udi mukolèle mu Texas, nè wàngate lukwàbò lwà lukolèle mu Arizona, kàdi ùmonè dishiilangana didi pankaci pàayi (wamònu anyi?), cilumbù ncyà buloba bùdiyi misòmbèle. Nwamònu anyi?

<sup>155</sup> Nènku mpindyewu, ba-Chinois, Chinois yèyè's muntu wa—wa kàlaabi, Japonais, nè bakwàbò, nè Chinois. Mwena Èthiopie yèyè ùdi—yèyè ùdi muntu wa bafiike, anyi Mufiike utùdi nendè mpindyewu ewu. Kàdi's wàkapweka mu matùnga à mîdimà awu kuntwaku.

<sup>156</sup> Nènku bàvwa—nènku—nènku bàvwa...Nè pashiishe muntu mutòoke yèyè ùvwa wa ba-Anglo-Saxon citùdi twikalangana eci. Nènku, bwà—bwà bantu bàdi apa aba, batùdi tubiikila

nè mbantu batòòke aba, mbafulmine mu Angletterre uvwa bangabanga ubiikidiibwa nè “Buloba bwà Mwanjèlò.” Nènku bwalu bàvwa batòòke, nè nsukì yà mitòòkòlòke, nè bikwàbò . . . Nè kutangalaka mu Irlande, nè mu Norvège, nè bakwàbò, lwà mwómò amu. Nè bònsò mbapàtùkile mu ba-Anglo-Saxons.

<sup>157</sup> Mpindyewu, uvwa wakumpàlà nganyì nè uvwa mwediibwe mulawu nganyì? Kakùvwa nànsha umwe wa ku bóbò to. Ndi mumanyè kùdi uteeta bwà kufika aku. Udi uteeta bwà kufika ku Ham. Ndi mumanyè kùdi uya aku, kùdi cisàmbà cyà Ham.

<sup>158</sup> Mpindyewu, kùvwa Ham, Sem, nè Yafètè. Mpindyewu Ham, yèyè—yèyè—yèyè kàakateeta kusokoka butakà bwà tatwèndè to, kàdi wàkaseka nè kumwelulwila. Ke Nzambì kwela Ham mulawu bwà mwàkatàngilàye butakà bwà tatwèndè kàdi kubènga kuteeta bwà kujika bundù bwèndè abu. Kàdi Sem nè Yafètè bàakalwa cyanyimà nè kubwikidija tatwàbò nkoozi yàbò pàvwàye mulààle panshì butakà. Nènku mpindyewu, Nzambì wàkambila Ham nè lukongo lwèndè nelùkwàcile bakwàbò mudimu.

<sup>159</sup> Mpindyewu, nwènù béle meeji nè aci civwa mmulawu, dyangata dyà diikala difiike, èè díbà adi, mwena Yuda pèndè's mmufiike. Nwènù nwela meeji nè aci ncifwànyine kwikala ci—ci, citùdi twètù tubiikila nè mmuntu wa bafiike aci, anyì, Bafiike bàà mu ditunga edi bàdi kaaba aka mpindyewu aba, s'bvwa bikèngela nwènù kuya mu Inde amu. Ba-Indiens mbafiike kutàmba nè Bafiike aba. Nkàadi mufike mu matunga àbò bònsò bàbìdì. Ke beena—beena Éthiopie mbòbò aba bàà ku Éthiopie kwàka, nè beena mu Àfrikè, muntu wa bafiike utùdi bamanyè leelù ewu awu's. Bàdi kuntwaku, bààbúngì bàà kùdibo bàcidi mu ngiikàdìlù wabò wa ku bùnsènji, mu bifuku byàbò amu. Ànu bu mutwàkadi pàakalwà Yesù apu.

<sup>160</sup> Muntu mutòòke ùvwa ànu wa ku bùnsènji ànu bu—bu mùdi mwena kalaba wa mu Àfrikè mpindyewu emu, pàmwàpa mutàmbe mene. Nwàvùlukaayi nè, kùkaadi bidimu binunu bìbidi kutùvwa twètù aba bantu bàà mu bifuku twenda butakà kuntwaku biikàle nè—biikale nè butà nè mikete nè cisuuyi cyà díbwe, twenda tulemba nyama (aci ncyà bushùwà menemene), twètù ba-Anglo-Saxons aba. Aci's ncyòci menemene. Díbà adi nganyì udi cinyì's?

<sup>161</sup> Mèmè nènkwàmbilè ewu udi mwediibwe mulawu awu leelù ewu ngewu udi ubènga Yesù Kilstò. Kwàjikì. Ewu udi witaba Yesù Kilstò mmubèneshiibwe.

<sup>162</sup> Mpindyewu, kwèna mwà kwamba . . . Nèmbande kuntwaku, nkapetàngànè nè Eskimo, pambèlu pàà ditunga kuntwaku. Kàdi's ke yèyè awu kuntwaku; nè muntu awu mmufiike kutàmba bantu bàà bafiike batùdi naabò kaaba aka aba. Nènye ku Inde kwaka nkapetàngànè nè ba-Indiens; kàdi yèyè—yèyè kí mmuntu wa bafiike to, mmufiike ànu wetù wa menemene ewu's. Yèyè's

mmufiike bikolè mutàmbe... ànu diikala dyètù dyà difiike dyà menemene edi. Nènku yèyè's nciitùdi tubiikila... Kàdi's yèyè ke Indien. Èè mpindyewu, mu Àfrikè tudi twangata bàmwè bàà ku bantu bàà mu Àfrikè bàdi... Bàmwè bàà kùdibo mbafiike bàà batàmùkèkù; bàmwè bàà kùdibo bàdi bàmba kufwànangana nè batòòke; nè bàmwè bàà kùdibo bàdi—bàdi mu mishindu mishiiilèshiiilàngàne.

<sup>163</sup> Wèwè muyè ku beena Yudà; nènku udi wamba nè beena Yudà bônso mba—mbàà dikòbà dibwicidile. Mwena Yudà mmuntu mufiikùlùke, kàdi nkàadi mubàmòne bààbúngi bàà nsuki mikünze nè mèsù à bleu, nè dikòbà ditòòke. Nwamònu anyi?

<sup>164</sup> Pa nàнку cintu cyònsò mu kaabujimà cidi nùнку: twètù bônso tudi bafùmine ku mucì wùmwèpelè. Ncyà bushùwà. Nè twètù bônso twàkeediibwa mulawu mu cibùlà cyà ku Edènà. Nè tudi bônso basùngidiibwe ku dibiiikà dyà ku lufù dyà Yesù Kilistò. Amen. Ke cyòci aci's. Pa nàнку kakwènakù mulawu nànsha wùmwè to. Bàdi beediibwe mulawu ng'aba bàdi kabàyi biitabuuja to, kàdi aba bàdi biitabuuja mbabènèshiiibwe. Pa nàнку kakwèna muntu nànsha umwe, mulundà wanyi, muntu mufiike anyi muntu wa bafiike, anyi muntu mutòòke anyi muntu wa kàlaabi to. Dìbà adi, byòbi nè muntu mufiike ùvwa mwediibwe mulawu bu mùdiye mufiike, nàнку muntu wa kàlaabi ùdi ànu mwediibwe mulawu citùpà's. Nè dìbà adi—nè dìbà adi muntu wa kàlaabi, nè pashiishe muntu mufiikùlùke, ùdi ànu mwediibwe mulawu mu byàbisàtù bibidì. Nwamònu anyi? Nènku dìbà adi, mwena mu Àfrikè yèyè mmwediibwe mulawu mu byàbitaanu bìnaayi's. Nènku ngèèla meeji nè Indien yèyè ke udi bulelèlè mulawu mutwile menemene dìbà adi's. Kaa, ekèlekèle! Macimbu kaayipu's wè! To! Cilumbù ncyà dishiiilangana dyà byuyuyà byà kuulu bishiilèshiiilàngàne nè bintu byà mu myaba yidi bantu basòmbèle. Mbakùdimùke, bifuku byabùlùke nè bikwàbò, kè kulwàbò bashiiilàngàne.

<sup>165</sup> Tàngilàayi ba-Indiens bàà mu Àmèrikè. Bààbúngi bàà kùdibo... Ba-Nàvajos kuntu kwàka kùdi cisà cyà bantu bafiike bikolè batàmbe nè mufiike wetù wa mu Ethiopie mu ditùnga emu, ba-Navajos abu. Ba-Apaches bòbò bàdi... Bàdi bu bàà—bàà diikala dyà lunyimù. Nè bifuku bishiilèshiiilàngàne... Nwamònu anyi? Nàнку ànu kuntwaku munkaci mwà ba-Indiens amu, mwòmò amu mene, udi usanganamù bafiike, nè nangàngà... Nènku ba-Cherokee mbenze ànu bu bàdi nè mubidi wà lubundubundu bu mutùdi emu, ba-Cherokee abu's. Nènku mu ditùnga emu, kùdi ànu kaaba aka bisàmbà bishiilèshiiilàngàne. Nàнку nudi numòna nè, kanwèna mwà kwamba nè mbeediibwe mulawu citùpà nè aba mbeediibwe mulawu mu kaabujimà to. Kabààkeediibwa mulawu nè bwalu bòbò mbafiike to. Kabààkeediibwa mulawu nè bwalu bàvwa bàà kàlaabi anyi nè bwalu bàvwa batòòke to. Kùdi mulawu ànu wùmwèpelè wùndiku mumanyè, nè mwinè awu mbupidyà bwà

Yesù Kilstò. (Ndi mumanyè, Donny, nè díbà dyàkànyì dyà mèmè kujikija, kàdi ndi nè nkonko mikwàbò yìbìdì.)

23. Mbímpè mpindyewu. **Mpenyì pàdì bisàmbà bijìmine dikùmi bitàngàlâke byà Izalèlèlà abi bisanganyiibwa (Genèsè 44.49), cisàmbà cyà Yözefu ku matungà àbúngì? Simeònà, Lewi, bàvwà kabàyi nè bwàbò buloba bwà sungasunga abu, kàdi batàngàlâke munkaci mwà bisàmbà bikwàbò dikùmi... Bisàmbà dikùmi abi bìdi penyì? Tudikù mwà kumanya pàdìbi bisanganyiibwa anyì?**

<sup>166</sup> Èyowa's, mukalenge! Bàdi mwà kumanya pàdìbi bisanganyiibwa. Bilondeshilàngàne nè dilonga dyà maalu à buloba bàdi mwà kumanya pàdìbi bisanganyiibwa mu Bible. Nè Nzambi ùdi ùtwàmbila muntwamu mwaba wikalàbi mu matùkù à ndekeelu nè cikala ndekeelu wabi. Nè mpindyewu mene, ndi mfùma ku dibala mukàndà kampàndà, bwà nè mu Izalèlèlà mwàmwa mwàkadibi bisanganyiibwa amu, mwaba wàkambàye nè kampàndà ùvwa mutùkije makàsà èndè mu maanyì nè bikwàbò byònsò. Nzambi mmubàtèèke bònsò pa kaaba kààbò, bashikika mu myaba mishilèshilàngàne. Nè beena Yudà bònsò bàdi munkaci mwà kwalukila mu Pàlèstinà, mùvwà Nzambi mulayè mu matùkù à ndekeelu nè nebìikalèmu.

24. Lukonko lukwàbò lùmwe: **Ndi mwà...Ncyèna mwà kwitabuuja nè Nzambi mmutume mvità bu dinyooka to. Ncyèna mwà kwitabuuja nè Nzambi ùdi ùtùma mvità bu dinyooka to. (Tèelejàayi ànu katanci.) Ncyèna ngiitabuuja mùdi bàmwè biitabuuja to, nè Nzambi wàkatèeka mwele wà mvità mu byanza byà bashipyanganyi kwambwila mu Baabùlòònà wa kale awu too nè ku Hitler, bwà kushipa bakàji bàdi kabàyi bamanye bwalu nè bàna munkaci...pàmwè nè bàdi bapùile, bwà kutwàla dinyooka dyà Nzambi. Nzambi àswèkù...Nzambi wanyì wa dinanga kì mmufwànyìnekù kwenza...Nzambi wanyì wa dinanga (Mfwilaayikù luse!), kwenza cyòci eci to. Mvità mmidimu yà Sàtaanà. Bu wèwè mwà kuswà ushìndikèku cibwejakàji eci.**

<sup>167</sup> Mpindyewu, anji indilaayi kakesè. Ndi mfùma kudibala eci ànu mu katanci kakesè emu, ke bwà cinyì ndi mutèèke elu mwìnshì. Mpindyewu, ndi muswè bwà nwènù kushààla ànu bapùwe katanci kakesè. Mpindyewu, twànji—twànji kwangataayi elu ànu buludi, bwalu elu's ndukonko lujimà. Nè lùdì nè cyà kulengiibwa nè kaneemu kààbúngì. Dyàkàmwè paanyimà pàà aci, bu nwènù mwà kutùtwàlaku kàbìdì katanci kakesè... .

<sup>168</sup> Ndi mumanyè nè díbà dikaadi dyènda dìya, kàdi didi... Vùlukàayi nè, bìdi byèenza cinyì mwine's? Mpindyewu, nuvwa nè ciibidilu cyà kuya kajà maja bufùkù bujimà nè kanùyì nucyùka bwalu to (nwamònu anyì?), nupàtuka nuya ku bintu

byà pa buloba, kàdi pàkaadibi bikafika ku Dìyì dyà Nzambi mu tusunsa tutwè ku makùmi àbidi, mwanèètù, bikèngela tùpetè muyiishi mupyamùpyà. Nwamònu anyi? S'mbundù. Pòlò wàkayiisha butùku bujimà. Mvwa muyiishe ànu kaaba aka kùkaadi bidimu too nè pa díbà ibidì nè isàtù jaajaaja mu dindà. Nènku bantu bàbànda bàpweka mu mwaba ewu ewu munkaci mwà kutùmbisha Nzambi pa díbà ibidì anyi isàtù jaajaaja wa mu dindà. Nudi bafwànyine kumòna bùngi butwè ku dikùmi nè bàbidi musangu ùmwè bàpeta Nyumà Mwìmpè pa díbà ibidì anyi isàtù jaajaaja. Nzambi ikalèku nè luse. Mvwa' a kujingakù bwà kucimòna cyàkàbidi. Kàdi katwèna mwà kucyènta to; ditùkù ndimanè kuya. Ditùkù ndimanè kuya mpindyewu; ndiyè bikolè mpindyewu. Dilòlò dikaadi dyènda diseemena nè bantu bàdi. . . "Èè, katwèna ànu tucyùka kàbidi to, pa nànkù. . . Ekèlekèle, ndi njinga bwà bàlekele, bwà twàmòna mwà kudilongolola bwà kubwela." Nènku aci cidì ànu—ànu bu mùshindù wùdici ciya awu.

<sup>169</sup> Indilaayi, ndi muswè kunukonkaku cintu kampàndà mpindyewu. Mpindyewu, nèngiikalè mwà kubengangana neebè ku mèyi, mwanèètù wa balùme anyi wa bakàji, ncyèna mumanyè to. Lùvwa lutèèkiibwe kaaba aka mu dindà emu. Mvwa naalù mu Bible wanyì nè mvwa munkaci mwà kulùtàngila kùkaadi katanci. Mpindyewu, mu mùshindù wà bulundà. . . Nè mpindyewu, ncyèna muswè bwà wèwè ku—ku—ku—kumfiikila munda to. Ndi muswè ùntèèlèjè nè ntèmà yònsò.

<sup>170</sup> Nènku tudi. . . Vùlukàayi nè, ndi muswè ànu mpetanganèku neebè ku mèyi pa eci—pa dipàngadika dyèbè pa eci ànu mùmvwà muswè kupetangana nè mukàji awu, mukàji mukwàte nè byà luse awu kùkaadi katanci. Kwambayè. . . Yèyè nè bàyèndè, bààkaya nè kusèlanganabò; nènku ke cìvwà bwalu abu. Kàdi yèyè ùvwa mwenze mucipù wèndè; ùdi nè cyà kushàala mulamàtekù. Nwamònu anyi? Nènku mpindyewu, bikèngela nshaalè mulamàte ku Dìyì dyà Nzambi.

Kàdi mpindyewu, **ncyèna ngùtabuuja. . . Kàdi dyàmbedi, ncyèna mwà kwitabuuja nè Nzambi ùdi ùtuma mvità bu dinyooka to.**

<sup>171</sup> Èè mpindyewu, mulundà wanyì, kùdi cintu ànu cimwèpelè cidì cibì mu diitabuuja dyèbè, ncyà nè, kí ndyà mu Mifundu to. Nzambi ùtu bushùwà ùtuma mvità bu dinyooka. Ncyà bushùwà. Nèn—nènkupèeshe Mufundu; ncyàkuwùbala ànu mwab'ewu nè pashìishe kukwambila to.

Tàngilàayi. **Ncyèna ngùtabuuja mùdi bàmwè bìitabuuja nè Nzambi wàkatèèka mwelè wà mvità mu byanza byà bashipyanganyi kwambwila ku Baabùlòonà wa kale too nè ku Hitler, bwà kushipa bakàji bàdi kabàyi bamanyè bwalu nè bàna.**

172 Bu mémè mwà kukwambila mu Dìna dyà Yesù Kilistò nè Yèyè wàkacyènza bulelèlè, nè mufwànyine kucijaadikila ku Bible, udikù mufwànyine kuciitabuuja díbà adi (nwamònu anyi?), nè Wàkacyènza bushùwà anyi? Èyo. Nè Yèyè neàcyènzè cyàkàbidi. Èyo. Nènku tèèlejàayi eci.

173 Ncyèna mumanyè to. Eci ncifwànyine kwikala mulundà wanyì wa katapula-katèèka udi musòmbe mwaba ewu bwà ku dyànyì dimanya; bwalu Nzambi Udi mu Dyulu mmumanyè nè ncyèna nànsha mumanyè cyanza cidì cifunda to. Ncyèna mwà kunwàmbila to. Kàdi ndi muswè bwà nùtèèlejè eci. “Nzambi wanyì n’Nzambi wa dinanga, Nzambi wanyì ùdi dinanga nè kí mmufwànyine kwenza nùnkù to. Mvità nyà kùdi Sàtaanà.” Nèntwe ku cyèbè nè mvità nyà kùdi Sàtaanà. Aci’s ncyòci menemene. Yèyè ke mfùmù wa buloba ebu. Bukalenge bwònsò nè ditunga dyònsò mu buloba ebu’s mbyà Sàtaanà. Nzambi mmwàmbè nè kí mùdibi nànkù mu Diyì Dyèndè. Sàtaanà kwambayè nè: “Mbyànyì mémè.” Yesù wàkiitaba nè bivwa byèndè yèyè. Kàdi Yèyè neàshaalè mupyànyì wa byònsò abi paanyimà pàà katanci, Yesù awu. Katwàkwikala kàbidi nè mvità to díbà adi. Kàdi Nzambi ùdi wànyishila Sàtaanà bwà kwenza cyòci eci bwà kulongolodiibwa ku bilèma nè bwà cilumbwidi.

174 Mpindyewu, ndi muswè kukukonkakù cintu kampàndà kumpàlà ànu menemene kwà twètù kubanga. Ndi muswè bwà wèwè kungandamuna cyòci eci nè kujandula. Wèwè kùyi witaabuuja nè Nzambi ùdi... (Mwàmbi’s)... nè kí mmufwànyine kwenza bintu ebi to. Ànu bwà kucibangila ku cibangidilu... Mpindyewu, mpaayikù maci èènù ònsò panwikalà nè mùshindù. Tèèlejàayi. Nzambi Yèyè mwinè wàkatuucisha Mwan’Èndè Sungasunga nè kuMushebeya pa nkùrusè bwà cinyi? Nzambi wàkashebeya Mwan’Èndè Sungasunga ku nkùrusè. “Kàdi byàkasànkisha Nzambi,” mwàkambà Mufundu, “bwà kuMutuuta, nè kuMuzaaza, nè kuMutàpa mpùtà.” Nzambi wàkenza Mwan’Èndè Yèyè mwinè mùshindù awu bwà kukusungila.

175 Ndi muswè kukonka bwalu bwà Shawùla, mfùmù munène wa Izalèlèlè. Nzambi wàkamwambila bwà kuya kuntwaku nè kukwàta Mfùmù Ogà nè byònsò byàkadìye naabi nè kubùtulayè bikolè bintu byònsò kuntwaku, balùme, bakàji, bânà, nè bikwàbò byònsò... Kàdi Shawùla... nànsha ngombe mene bwà kuyishipa, kàyi ulekelaku cintu nànsha cìmwè cìshààla nè mwoyi to. Ke Shawùlà kupwekayè kuntwaku nè kupàndulayè yimwè yà ku ngombe ayi. Ke Nzambi kuumusha Nyumà pa yèyè nè kuDitàpulula nendè; wàkalwa mwena lukunà wa Nzambi.

176 Mbwa cinyi Eliyà wàkiimana kwaka pàakafilà Nzambi Mfùmù wa kale Ogà awu mu byanza byà Aakàbà? Ke kwambilayè Aakàbà bwà kushipayè mfùmù awu. Ke Aakàbà kubèngayè kucyènza. Nè Eliyà mupròfètà awu kwambilayè

nsentedi bwà... Kwambayè nè: “Ntápà nè mwelè wèbè wà mvità.” Kujingululayè nè yèyè ùvwa mupròfètà.

Yèyè nè: “Ncyàkucyènta to.” Ke kujimijayè mwoyi wèndè. Pashiishe kwambilayè mukwàbò awu, wàmba nè: “Ntápàanyi.” Nènku muntu awu kumutàpayè nè mwelè wà mvità nè kumukòsayè. Nè yèyè kudijingila mu didisokoka nè kwimana mwaba awu. Kàdi ke Aakàbà ulwàlwa ewu mubànde pa dikalu dyèndè dya mvità.

Yèyè nè: “Ncinyi—ncinyi cyùdi mwimànyìne lwà apa?”

Yèyè nè: “Èè, mèmè’s mvwa nsentedi; mvwa mupèèshìbwe bwà kutabaleela muntu kampàndà. Nènku yèyè kuntuuta nè kunyeema,” mwàkambàYe, “nènku mèmè kumulekela ùya. Nènku bàvwa bangambile nè mèmè mwenzè nànkù, bikèngela bwà mfutè nè mwoyi wànyì.”

Yèyè nè: “Èè, nebikèngelè bwà ùfutè nè mwoyi wèbè sungasunga.”

Kudikùtululayè nè kwamba nè: “EMU MMÙDÌ MUKALENGE WÀMBA, bwalu kùvwa mushipè mfùmù awu kuntwaku to, wèwè mwinè newikalè difutu bwà bwalu abu.” Ncyà bushùwà anyi? Ncyà bushùwà menemene.

<sup>177</sup> Lekèlaayi nnùbadilèku cintu kampàndà mwaba ewu. Kàdi bìshi bwà Baabùlòonà, pàvwà Yoshùwà... pààkatùmà Nzambi Yoshùwà dyàmwàmwa adi, nè yèyè kubùtula bânà bakesè bàà mu mabòkò, bânà, nè bikwàbò byònsò. Kàdi bu yèyè mulekèle cintu cìmwèpelè nè mwoyi... Yèyè wàkavingutula bintu byònsò nkòong. Bânà bakesè bàà beena Pelèshèètè, kubàbutulayè ànu nàka. Nzambi nguvwa mumutùmine dīyī. Kàdi yèyè kàyì mucyènzè to, ùvwa mmwoyi wèndè sungasunga wùvwàye ùshintakaja.

<sup>178</sup> Nèncijaadike mu katanci kakesè. Nzambi ùdi dinanga, dinanga dipwàngàne; kàdi kanwèna bamanyè cidi dinanga to. Ke bwà cinyi leelù ewu bantu kī mbamanyè nè diitabuuja ncinyi to. Nzambi ùdi dinanga. Bikèngela Yèyè ikale mu dinanga; Yèyè’s mmudishikàmine ku Dīyī Dyèndè. Nènku bikèngela bwà Yèyè kushààla mukwàte ku Dīyī Dyèndè. Bikèngela bwà Yèyè akunangè. Nènku Yèyè mukunangè, bikèngela bwà Àkukùbè.

<sup>179</sup> Tèèlejàayi apa. Nwènu bàdi bààkula bwà dinyanguka dya bânà abu. Anji indilaayi kakesè, ngǎnji nnùleejè cintu kampàndà kaaba aka mu Mifundu, cidi—cidi Bible wàmba bwà bintu ebi kaaba aka. Tūyaayi apa bwà tūtèelejè ànu eci ànu bwà katanci kakesè cyanàànà bwà tūmonè cidi Nzambi mwàmbè. Mpindiyewu, ndi mbala mu Yèhezèkèlè nshapità wa 9, panwikalà baswè kucifunda. Tèèlejàayi nè ntèmà:

Nè... Yèyè wàkeela kàbìdi lubilà mu maci àànyì nè dīyī dikolè, nè wàmba nè: Enzèja aba bàdi nè bujitu pa cimenga abu bwà bàseemenè pawìpi, ... muntu

*yônsò nè cyamu cyèndè cyà kubùtula naaci mu cyanza.*  
(Mpindyewu, eci's n'Nzambi udi wakula.)

*Nènku, mònaayi nè, bantu bàsambòmbò bàakafumina ku njila wa ciibi cyà citàmbe kutumbuka, cidi citàngile ku nord aci, nè muntu yônsò mwikale nè cyamu cyèndè cyà kushipangana naaci mu cyanza; kàdi muntu umwe munkaci mwábò úwva muvwàle bilàmbà bitòoke biikàle byà linà, nè kalòndò kàà màyi à mufundi wa mukàndà kapàya ku luseke lwèndè: ke kubwelabò, nè kwimana lwà ku...ku luseke kwà cyoshelu cyà cyamù cyà mitakù.*

*Nènku butumbi bwà Nzambi wa Izàlèlèlà bwàkajuuka pa bakèlùbà, mwaba wuvwàyè úsanganyibwa, too nè ku cibweledi cyà nzùbu aku. Ke kumbùkilayè... kubùkilayè muntu uvva muvwàle bilàmbà byà linà bitòoke, mwikale nè...mwikale nè...kalòndò kàà màyi à mufundi wa mukàndà mu cyanza cyènde—anyi ku luseke;*

*Nè pa nàнку...Nènku MUKALENGE... (M-U-K-A-L-E-N-G-E nè dileeta dinène, udi mwikale Nzambi)... MUKALENGE kumwambila nè: Picilà munkaci mwà cimenga, munkaci mwà Yelusàlemà,...uteekà cimanyinu pampàlà pàà bantu bàdi bàpimuna nè... bàdila bwà...binyangu...bidì byenjiibwe munkaci mwábò.*

*Nè kùdi bakwàbò yéyè... (MUKALENGE awu's)... kwamba ku maci àànyi nè: Ndàayi paanyimà pèndè mu cimenga cijimà, nè tàpaayi: nè disù dyènu kaditèeki ku luseke to, anyi kanwikadi nè luse nànsha: (Tàngilàayi, mvensà mw16.)*

*Bònsò nkòong—Shipàayi bònsò nkòong banunu... bansòngà...bavirgò,...bàna bakesè,...bakàji:... (Nzambi ngudi mwàmbè nàнку awu. Nzambi ngudi mwambè nàнку awu's!)...kàdi kanùsemenyi pabwipi nè muntu kanà yônsò udi nè cimanyinu to; nènku yéyè kubangila kùdi bakùlù...ku mwaba wa cijila—nè bangilaayi kùdi bantu bakùlù...bàvwà bàsanganyibwa kumpàlà kwà nzùbu.*

<sup>180</sup> Mu ngaakwilù mukwàbò, Nzambi wàkambila bantu aba nè: “Mpindyewu, anji indilaayi; nêngänji kutwà bantu cimanyinu dyàmbedi, aba bàdi badilàmbùle mu bulelèlè kùdi Nzambi...” Ke Yéyè kubàtwa cimanyinu. Yéyè nè: “Mpindyewu,” kùdi bantu bàdi nè cyamu cyà dishipangana naaci aba, “nwènu ndàyaaku nè kanwèpudi bakàji, bàna, anyi cintu nànsha cimwè to, kàdi nwènu shipàayi bònsò nkòong cintu cyònsò.”

<sup>181</sup> Mu cikondo cyà kumpàlà kwà mvùla yà Noà mu kabùtu, pàvwà miliyò kuvudija ku miliyò ne miliyaalà yà bantu pa

buloba, ke Nzambi kutùma muyiishi mukulakaji wa beena cijila dínà dyèndè Noà, nè kuyiishayè munda mwà bidimu lukàmà nè makùmi àbìdì, nè kubàmbilayè bwà kubwelabò mu bwátù, nè bônso bàvwà kabàyi babwelè mu bwátù abu bàvwà nè cyà kubùtudiibwa. . . Nènku Nzambi wa Bukolè bwónsò, uvwa nè bukontononyi bwà mauulu awu, wàkatùma mvùla wakabùtula mìliyò ya bakùlumpè, yà bansònga bônso nkòong, yà bàna bakesè bàà mu mabòkò, munkaci mwà kudyòwa nè kubùtuka mu màyi.

<sup>182</sup> Nzambi wa Bukolè bwónsò, mwìnè awu n'Yèyè ùdi Nzambi mulelèlà wa dinanga. Nè aci's ncilelèlà. Bikèngela Àcyènzè. Yèyè mmunangè Bèndè Sungasunga. Bikèngela Ìkalè mudishikàmìne ku Diyì Dyèndè. Nànku kí mbwà. . . bwà dikòkangana to, kàdi kubènga kutwà ku cyèbè. Nzambi Webè wa dinanga awu. . .

<sup>183</sup> Mwab'ewu ànu àbìdì àdì panshi aa mvwa nyiikila. . . Pàmwàpa ùdi Ntèmu wa Yehowàh pànga apa. Muntu awu kujuuka kwamba nè: "Mwanèètù Branham, udi uswa kungambila nè udi witabuuja nè ifernò wa ùlàkuka kapyà ùdikù anyi?"

Mémè nè: "Kí ncìndì mémè ngàmba to, ncìdì Bible wàmba."

Yèyè nè: "Udi uswa kungambila nè Taatù wa mu Dyulu munanga mmufwànyine kwosha bàna Bèndè anyi? Mòna's," yèyè nè: "kwèna mufwànyine kwosha mwanèèbè to."

Mémè nè: "To, mukalenge!"

"Èè díbà adi, piikalàbi nè wèwè muntu mwà kwikala nè dinanga búngì nànku (nwamònu's, mùshindù wùdì bantu mwà kunyangakaja cintu aci anyi?), pawikalà wèwè bu muntu mwà kwikala nè dinanga dyà mùshindù awu, udi wela meeji nè Taatù wa mu Dyulu munanga mmufwànyine kubùtula bàna Bèndè anyi?"

<sup>184</sup> Mémè nè: "Nànsha kakesè!" Yèyè kèna ùbùtula bàna Bèndè to, kàdi wèwè udi mwànà wa nganyi? Nzambi kèna ùbùtula bàna Bèndè to. Ùdi ùteeta nè Mwèndè mwónsò bwà kubàbwejamù. Kàdi ndyabùlù udi mulekelela awu wàbùtula bàna bèndè. Pa nànku Nzambi ùtu ànu wànyishila Sàtaanà.

<sup>185</sup> Tàngilàayi. Nganyi wakanyishila bubì bwà kupwekabù pa buloba nè Sàtaanà bwà àpatukè nè àbutulè musadidi mutàmbe kwikala mupwàngàne wa Nzambi too nè ku Yesù Kilistò, bàna bèndè nè byónsò bìvwàye naabì, Yobò awu's? Ke Nzambi kutuma nyumà wa lwonji kuntwaku nè kubutula bàna bàà Yobò bônso nè byónsò abi ànu bwà kuteeta musadidi Wèndè. Ncyà bushùwà anyi? Bushùwà.

<sup>186</sup> Kaa, ndi mwà kwimana kaaba aka bwà díbà dijimà ànu bwà kunùleejabù cyanàànà, Mwanèètù wa balùme, Mwanèètù wa bakàji. Ncyà bushùwà, nànsha wèwè mwikàle nganyi. Kùbwejakajikù Nyumà wa Nzambi ewu to. Mvità yitu manyooka

à Nzambi pa matùngà. Kabùtù nkatùmiiibwe kùdi Nzambi. Bible ngudi mwàmbe nànkù. Nènku Nzambi ùdi Nzambi wa dinanga, kàdi Nzambi ùdi kàbidì Nzambi wa cijji cikolè. Nènku kwàdyákukiimana kumpàlà kwà wa dinanga. . . Aci's ke cintu cidi cyènzela èkèleeziyà bibi leelù ewu.

<sup>187</sup> “Taatu kampàndà wa dinanga, mu bushùwà bwà bwalu Yèyè kî mmufwànyineku kucyùka pàndi ngèza cyôci eci to.” Wèwè muswè kucyèza, mbipiciibwe nè wèwè muyè kacýenza, bwalu dinanga dyà Nzambi kadyèna munda mwèbè to ànu kwìnè kwònsò aku.

<sup>188</sup> Tukàadi pabwîpi nè kwangata Mèèsà à Mukalenge ànu mu katanci kakesè emu, nènku ndi muswè bwà eci cibwelèku citùkine ànu menemene. Bwalu bùdiku bùdi nè, cidi mu mwoyi wèbè aci necilelè, ke cyèzà mwoyi wèbè. Mùshindù wà dimiinu dyùdi wèwè mwelè mu buloba adi awu nedikwamè bilondèshile mùshindù wàdi. Mmunyi mùdi mwà kwangata cikùnnyibwà cyà—cyà ditalà kàdi kucivwija cisoosà cyà—cyà nkùlaanyi? Kwèna mwà kucyèza to ànu mùdi kùyì mwà kwangata lutete lwà ditalà nè kwenza mpoopu to. Kwèna mwà kubyèza to, bwalu nngiikàdilù yìbidì mishiiàngàne, myoyi yìbidì mishiiàngàne menemene. Kùdi. . . Udi—udi mufwànyine kwangata dimiinu dyà nkùlaanyi nè dimiinu dyà ditungulù, nè adi àmwèka mafwànàngàne bikolè menemene mu mùshindù wà nè muntu wa mutàmbe bwîmpè kàyì mwà kuàsunguluja to. Ncyà bushùwà. Cintu cimwèpelè cidi cikèngela bwà wèwè kwenza ncyà kuàkuna. Ónsò àbidi àmwèka mafwànàngàne mu bufùki, kàdi àkùnebì's. Bùbidì bwàwù neàkwamè; kàdi òmwè nediiikale nkùlaanyi nè dikwàbò nediiikale ditungulù. Aci's ncilelèlè menemene.

<sup>189</sup> Wèwè udi wamba nè: “Mòna's, ncinyi cidi cyèza nè dimiinu *edi*, s'didi òmwèka ànu menemene difwànàngàne nè *edi*, dipatula mwoyi wà mùshindù mushiiàngàne's?” Mbwalu mwoyi wà mùshindù awu ke wùdi munda mwàdi.

<sup>190</sup> Nènku mulùme anyi mukàjì udi udyàmbe mùdiye mwena Kilistò kàdi kàyì nè nsòmbelu wa mùshindù awu to, ku ngàsà wa Nzambi, ùdi cisoosà cyà nkùlaanyi. Ku mamuma àbò nkunwàbamanyinà. Cintu aci cyôci mu mwoyi wèbè, cidi cìfila bujaadiki bwà cyùdi mu mwaba kampàndà mukwàbò. Pùikalàci bubì, cidi cìfila bujaadiki bwà nè udi mwìnshì emu. Paùdi ufwà, newikalè nè cyà kuya ku mwaba kùkaadi mumanè kusanganyiibwa aku.

Pawikalà mwîmpè nè mwikale—mwikale mwîmpè bwalu Nzambi mmukuvwije mwîmpè, nènku udi mulediibwe cyàkàbidì, udi mwenzèjiiibwe bwà kulonda njila awu, bwalu Mwoyi awu newikale nè cyà kufila bujaadiki bwà kaaba aka. Wòwò wùfila bujaadiki bwà apa, s'ke kùyaaya aku's. Wòwò ùfila bujaadiki bwà kuulu kwàka, s'ke kùyaaya aku. Nwamònu anyi?

<sup>191</sup> Cyùdi wêwè kaaba aka aci... Lamàayi eci mu meeji ènù mpindyewu's. Nkaadi njikija. Kàdi cyùdi mwab'ewu ncimanyinu cyà nè udi cintu kampàndà cikwàbò mwaba kampàndà. Nutu misangu yònsò ànu baswè kwikala mu bupwàngàne, nwènù beena Kilistò. Kùdi bupwàngàne kampàndà, nè bupwàngàne abu kabwèna mu mwoyi ewu to. Kàdi mulùme yònsò nè mukàji yònsò kaaba aka udi mwena Kilistò awu, muntu yònsò udi mwena Kilistò kaaba aka mpindyewu ùkaadi mumanè kutùmbishiibwa mu Bwikadi bwà Yesù Kilistò. Nè wêwè ukàadi nè mubidi mukwàbò. Kwàkuwùpeta mûngà musangu to, udi naawù mpindyewu mene. Ànu mpindyewu kùdi mukwàbò mubidi munkaci mwà kukwindila pùikalà ewu nùnkù nè cyà kubùtuka. Nudikù mwà kudifwànyikijila aci's. Longàyiibi aci ànu katancì kakesè.

<sup>192</sup> Nudikù bamanyè nè muntu nè muntu wa kutùdi ùdi mwà kудisangana mu cyendèlèlè kumpàlà kwà dîbà kujúukadi màalabà mu dindà anyi? Mpindyewu, wêwè kùyi mwena Kilistò to, mulundà wanyì, nkukushàadile cintu ànu cìmwèpelè. Bikèngela ùye mùshindù awu. Pawikalà mu njila awu, bikèngela ùye mu njila awu. Wêwè mwikàle ditungù dyà ditalà, neùkwamè ditalà. Wêwè mwikàle mpoopu, udi upàtula mwoyi wà mpoopu. Mpindyewu, pawikalà uvwa wa mu èkèleeziyà kampàndà mu mwaba kampàndà udi kàyi mumanyè nè kàyi ùlongesha to, kàdi ùkulekela ànu ulwa mu èkèleeziyà bwà kwikala cidimba cyà èkèleeziyà... Wêwè udi wamba nè: "Èè, Mwanèètù Branham, wanyì èkèleeziyà ùtu ùlongesha nè tudi nè cyà kwitaba Yesù Kilistò bu Musùngidi wetù sungasunga. Twètù biitabùùje ànu Mukalenge Yesù Kilistò tudi basùngidiibwe." Nsòmbelu webè yèyè kàyi ùkùmbanangana nè cyòci aci to, kwèna mwanji kucyènza to.

<sup>193</sup> Nutukù bamanyè nè dyabùlù ùtu wìtabuuja nè Yesù Kilistò m'Mwànà wa Nzambì anyi? Nutukù bamanyè nè Yesù bantu bitwilàngàne, anyì, nutukù bamanyè nè dyabùlù wàkajikula bantu bitwilàngàne nè Yesù ùdi Mwànà wa Nzambì anyi? Kàdi's yèyè kàvwa musùngidiibwe to. Nè kàvwa mwà kusùngidiibwa to; yèyè's ndyabùlù. Pa nànkù kujikula nè Yesù m'Mwànà wa Nzambì...

<sup>194</sup> Nutukù bamanyè nè Bàfaalèsà bònsò nè Bàsadoka abu, muntu nè muntu bàvwa bantu bàà kaneemu kakolè bwà ntèndeleele nè batèndeleeedi bàà dipòkò anyi? Mùshindù wùvwàbo banange Nzambì nè myoyi yàbò, mwàkadìbo bàdyàmbidila's, kàdi kupanga kumòna Yèyè uvwa kàyi mwenzè bwalu awu, Mwànà wa Nzambì, bwà kuMujingulula nè Yèyè ùvwa Mwànà wa Nzambì! Kàdi nànsha nànkù, bàvwa batèndeleeedi bàà dipòkò (ncya bushuwa anyi?), bàà kaneemu ka butèndeleeedi kàà dikèmà, bàà dimanya dyà mabàlà dyà dikèmà, bàvwa bamanyè Bible bimpè kutàmba ní nganyì ní nganyì wà ku bamanyì bèètù bàà mabàlà bàà leelù ewu. Kabàvwa nè cintu

nànsha címwè cyà dyenza to ànu kusòmba mwaba awu mu nkóngò yàbò ayi nè kukwacila Mukalenge mudimu.

<sup>195</sup> Mpindyewu, tàngilàayi cidi Mufündü wàmba: “Mu matùkù à ndekeelu. . .” Bwèñù nwèñù, balundà bàanyi beena Kilistò, nè dinanga dyà cijila, Bible mmwàmbe nè: “Mu matùkù à ndekeelu bantu. . .kùvwa kufwànyine kulwa cikondo cívwa bantu mwà kwikala nè mitù mikolè, badibàndishi, banangi bàà bisànkasanka kutàmba kwikala banangi bàà Nzambi.” Mpindyewu, aci kî m’bulelèlà anyi?

<sup>196</sup> Muntu kampàndà mu nzùbu emu wàkaya ku fètè wa Cidimu Cipyacipyà dilòlò kampàndà, kàdi mu nzùbu wa mwìnshì bàvwa munkaci mwà kunwà maala mashémè nè bàpicisha díbà nè bènza maalu à lukutukutu, didyà dyà nyòngà yà mabwe mitalàle, nè bikwàbò. Nànsha mene maèkèleeziyà’s àtu àlongolola maja. Ànu menemene cívwa Nzambi mubàmbile bwà kabèñji aci, bàdi bènza mu Dîna dyà Kilistò. Kàdi’s cidi Yesù mwàmbe bwà Èkèleeziyà kwenzayè ncyòci eci, kàdi bóbò bàdi bàcívila. Yesù, mèyi Èndè à ndekeelu ngòwò aa, diswa Dyèndè nè cipungidi Cyèndè kùdi Èkèleeziyà: “Ndaàayi pa buloba bujimà; nùyiishè Èvànjeeliyò kùdi cifùkùibwa cyònsò. Ewu udi witabuuja nè ùbàtiijibwa neàsungidiibwè; ewu udi kàyì witabuuja neàpiishiiwbè. (Pàmwàpa apu’s ke pàdi mpaasàtà webè wimanyikila dibala. Kàdi ntùngunukilu waci nyewù.) Bimanyinu ebi nebìfilè bàdi bìitabuuja; mu Dîna Dyànyì bóbò nebiiipate badémóns; nebàakule mu myakulu mipyamipyà; bóbò bakwàte nyòka nè byanza anyi banwè bintu bìdi bishebeyangana, kabyàkubènzela bwalu to; nè bóbò batentèkèle babèèdi byanza, babèèdi nebàsàngalè.”

<sup>197</sup> Mpindyewu, ke cyàkambà Yesù bwà kwenzabò mu Dîna Dyèndè aci’s. Bàdi bàvila nè aci kacýènakù, kàdi’s bàyaaya nè bènza ànu cidi cibèngangana nè cyàkambàYe, bàlongesha nè aci cikaadi cipite, kacýèna nè bwà nsongo nànsha, kàdi bàlongesha tèolòji pamutù pàà aci’s. Kaa, kabyèna bikèmesha to mutùdi mu ngiikàdilù wutùdi ewu’s.

<sup>198</sup> Tàngilà kùnweku, lekèlà nkwambile’s, mwanèètù wanyì. Pàdi Èkèleeziyà ùfika mu kaaba kàà nè pàdiye, mu mùshindù wà nè cidimba cyònsò cidi muntwamu cyujiiibwe nè Nyumà Mwimpè nè bukolè, too nè piikalà bimanyinu abi mwà kufila.

<sup>199</sup> Ndi mvùluka Pòlò Munsantu kuntu kwàka pa cisanga paanyimà pàà màzùwa mamanè kusùnsuka. Nzambi ùkaavwa mumupèeshe cikeenà-kumòna’s. Pàvwà matùkù dikùmi nè ànaayi à muunya nè à bufùku. . .Ditèkemena dyònsò dyà nè bàvwa mwà kusungidiibwa dimanè kuya. Kaabwàtù kakesè, kàà kale aku kàvwa kàdikùpa mùshindù ewu, nè bònsò bàvwa bàdila myadi, nè munda mwà matùkù dikùmi nè ànaayi à muunya nè à bufùku. Pòlò ùvwa kuntwaku, ùvwa mupetè cikeenà-kumòna. Kupàtukayè; nè kwambayè nè: “Kolèshaayi mwoyi,

bwalu Mwanjèlò wa Nzambi, Ùndi musadidi Wèndè, mmwimàne ku luseke lwànyì nè mwàmbe nè: ‘Kùcìinyi nànsha, bwalu udi nè cyà kutwàdiibwa kumpàlà kwà Kaayisà. Nènku mònaaku nè, Nzambi mmukupèeshe bònsò bàdi bènda pàmwè neebè mu màzuwà abu.’”

<sup>200</sup> Pààkataayikà màzuwà nè kuya nè ku mpengà kwà màyi, nè kukafikabò too nè lwà kùvwà beena kalaba aku, Pòlò ùvwa munkaci mwà kwangula ndambù wa nkùnyi, nènku kuyayè bwà kuyèèla mu kapyà. Nènku munkaci mwàyi amu mwàkadi nyòka munène, wakamujingila ku cyanza. Mpindyewu, nyòka awu kàdi kumupwidijila lulengu lwèndè mu cyanza lùvwà lufwànyine kumushipa mu kasunsà kàmwèpelè. Beena kalaba kwambabò nè: “Tàngilàayi numòne mùdi muntu awu ùdishinda ùfwa, bwalu yèyè neáfwe ànu mu kasunsà kàmwè emu.”

<sup>201</sup> Ùdi mu nkànu bwà kuyiisha kwà Èvànjeeliyò. Batèndeledi mbàvwà bamwele ku nkànu. Èkèleeziyà yà mitàmbe bwìmpè menemene yà ditùkù adi ke yòyi yàkamwelà mu nkànu. Bu kabùyì ànu bwà Dìyì dikùlù dya Ètats-Unis to, bàvwa mwà kwenza cintu cimwècimwè aci leelù ewu. Ncyà bushùwà’s! Indilà ànu too nè pàdidi—too nè pàdidi ònyangakajiiibwa kàbidi ndambù.

<sup>202</sup> Ke nyòka kumupyà ku cyanza. Mpindyewu tàngilàayi. Pòlò kàakaciina to. Yèyè nè: “Yèsù Kilstò mmwambè nè: ‘Bòbò bakwàte nyòka nè byanza, kabyàkubènzela bwalu to.’” Pa nànkù ùdi wènda kaaba aka, ùmunyùkula mu kapyà; ùkùdimuka ùya kuntwaku bwà kwangata mikwàbò nkùnyi nè kuyèla mu kapyà; kùkùdimuka nè kudinànga nyimà ku kapyà, nè kùkùdimuka luseke lukwàbò elu nè kudinànga byanza ku kapyà. Beena kalaba kwambabò nè: “Kèna ùfwa bwà cinyi? Muntu wàwa kèna ùfwa bwà cinyi’s? S’bìvwa bìkèngela kwikalayè mukùlùke mufwè.” Kàdi Pòlò ùvwa mutàmbe kuula tètè nè Nyumà Mwìmpè (nudi bumvwè cìndi muswè kwamba aci anyi?), mùle tètè bikolè nè Nyumà Mwìmpè mu mùshindù wà nè lulengu alu kalùvwakù lufwànyine kumushipa to.

<sup>203</sup> Kaa, mwanèètù, mpèeshaayikù èkèleeziyà mùle tètè nè Nyumà Mwìmpè. Nzambi’s neenzè mu cidimu cimwèpelè cidi beena tèlòlji bònsò bapangile kwenza munda mwà bidimu binunu bìbìdi bijimà. Indilaayi nwènù too nè piikalà dilaabiibwa dya Èkèleeziyà mwà kulenga bushùwà bàshàadilè bakesè bàà lulamatu abu. Paanyimà pàa biibi byà bàà Bisàmbà byà bendè bimanè kukàngika, kaa, Nzambi’s neàlaabè Èkèleeziyà dìbà adi. “Ewu udi mukooyikè, àtùngunukè ànu nè kwikala mukooyikè. Ewu udi mwakàne awu àtùngunukè ànu nè kwikala mwakàne, nè ewu udi wa cijila àtùngunukè ànu nè kwikala wa cijila.” Nènku Nzambi neàlaabè Èkèleeziyà nè Bukolè bwà Nzambi, nè bintu nebùikalè byènzeka. Kì ng’ànù aci dìbà adi to, kàdi Yèyè ùdi munkaci mwà kucyènza mpindyewu.

204 Tàngilàayi nùmonè bimanyinu nè maalu à kukèma; pashiishe bantu bàdi bàkènzakana bàmba nè: “Èè, mbyà dyabùlù.” Kaa, bwalu kí mbamanyè Mifùndu, nànsha bukolè bwà Nzambì to. Nènku ke bwà cinyi bàdi bàmba nànkù’s.

205 Mukalenge ànùbènèshè. Nwamfwilaayikù luse bwà dinùlama too nè pashiishe nùnkù’s. Ntu ngèza eci ku mpùùkàpùùkà, kàdi ncyèna nshààlà neenù ntàntà mule menemene to. Pa nànkù ndi mwà kwikala ncyi mwandàmùne ku nkonko eyi bilondèshìle meeji ènù nè bikwàbò to. Ayi yìvwa nyìbidi yìvwa myandamuna mu dindà emu. Mémè ncyi mwenzè nànkù to, Nzambì ànùbènèshè. Nènku nciwva—nciwva nè meeji à kunùbìndulula anyi cintu kampàndà to. Bìvwa ànu bìkèngela bwà kwamba cidì. . . Nudi nungeela lukonko. Ndi ngèza nè dyànyi pàànyi dimanya dyònsò bwà kwandamuna. Ncyà bushùwà.

206 Mpindyewu, ncyèna mumanyè bintu bipitèpìte bùngì to pàmwàpa. Ncyèna mumanyè kantu nànsha kàmwè kàmvwà mufwànyine kumanya to. Kàdi cintu cìmwèpelè cìndi mumanyè ncyà nè, Yesù Kilistò ùdi ùtùsùngila ku mpèkaatù, ùtùlama ku mpèkaatù, nè ùtùpèèsha bukolè Bwèndè nè mabènesha Èndè.

207 Nènku bu nwènu ànu mwà kumòna myaba yònsò nè kutàngila cidì cyènzekà mu bantu bàdìbo bàsambidila abu. . . Tàngilàayi mu matunga ónsò nè tàngilàayi bimanyinu nè maalu à kukèma myaba yònsò. Kàdi tàngilàayi cikondo cìcìlwalwà. Ànu mùvwà matàmbà àbìdì atùvwà tuyiishapù kukaadi cikondo kampàndà awu, majuukile mu Genèsè, mùshindù wùdiwu àfla majaadiki àwù myaba yònsò. Mùshindù mwìnè wùvwà mwena bupidyà, mwitabi wa maalu ànu mùdiwu mafùndiibwe nè muneemèkiibwe mu ntèdeleelu wèndè, kàdi mwikàle nè cìmwènekèlu cyà difwàna dyà Nzambì, kàdi mwikàle ùvila bukolè bwàdì. . . Nè Èkèleeziyà ùdi ànu mutùngùnùke nè kuya kumpàlà.

208 Mukalenge Yesù ànùbènèshè, muntu nè muntu, ke disambila dyànyi ndyòdi adi. Nè swàyikù nwikalè nè mwoyi mu mùshindù wà nwènu kutàmba kulwa nè bujitu, Nzambì ànwambikeku nwènu aba, nùtambè kwikala menemene nè bujitu bwà misùùkà mijimìne mu mùshindù wà kanùyìku mwà kulààla butùku nè muunya nànsha. Nzambì enzèku bwà Branham Tabernacle ewu àpetè dyèsè dyà kuvwijibwa nè bujitu bwà menemene. Nànsha byòbì nè kacya ní kùtùkù mwánjì kwela mbilà, ní kùtùkù mwánjì kwenza ní ncyi ní ncyi cikwàbò to, wèwè mutàmbe kwikala ànu nè bujitu bwà misùùkà mijimìne mu mùshindù wà kùyìkù mwà kulààla to. Paùdì wenza nànkù, bàà pa buloba nebàdifinde mwaba ewu bwà kubàsambidilabo. Ncyà bushùwà. Bàà pa buloba nebàlwe bwà kubàsambidilabò. Nenùmanyiibwè myaba yònsò. Nzambì àtùpèèshèkù Nyumà Wèndè awu: tùvwijèkù badìpwekeshi; tùcibùlùlekù; nè tùvwijèkù batàmbe kuujiibwa nè bukolè bwà Nzambì bwà kwondopa babèèdi, bwà kwipata

badémóns, bwà kwenza bimanyinu binène nè maalu à kukèma; paùdi utentekela babèedi byanza nè ulòmba dibènesha adi, kùyi nè ditèkankana nànsha dimwè mu mwoyi wèbè to, udi witabuuja nè Nzambi neàcyènzè. Tàngilàayi mubèedi awu, yèyè's neàbange kusàngala. Bwà cinyi? Bubì mbupàtùkemù. Mbyenze ànu bu mucì wàkadì mwimàne awu, Yesù kutàngila, kàdi kawùvwa nè dimuma nànsha dimwè to. Yèyè nè: “Wèwè's udi mwediibwe mulawu.”

Paanyimà pàà mèbà makùmi àbìdi nè ànaayi bóbò kupicila mwaba awu. Peetèlò kwamba nè: “Tàngilàayi's, mabèji's ngòwò aa mamane kufùbidila.” Cintu kampàndà cìvwa cyènzèke. Dìyi dya Nzambi dìvwa dyakùdiibwe.

<sup>209</sup> Yesù wàkamba nè: “Ikàlaayi nè diitabuuja mu Nzambi. Bwalu wèwè mwamBILE mukùnà ewu nè tentèmùkà, nè kùyi ucyèla mpatà to, newùkutùmikile.” Ikàlà nè diitabuuja mu Nzambi.

Mpindyewu, ncikondo cyà Mèèsà à Mukalenge. Patùdi twinyika mitù yètù apa nèndombè bwà muntu kampàndà kulwayè ku cisanji cyà pyànò eku.

<sup>210</sup> Mukalenge, s'ke dìbà edi, dìbà dìdi pàmwàpa balùme nè bakàji, Mukalenge, pa buloba bujimà mwà kumòna nè dìbà dinène dyà cilumbulwidi dikaadi dyènda dìseemena diikala Nzambi mwà kulumbulwisha matùnga ònsò mu ngiimànyinù yàwù yà cididi. Myaba yònsò, mwaba wònsò, nè bantu bònsò bàdi nè cyà kutwàla manyooka à Nzambi. Nènku Taatù, tudi nè disànkà dyàbùngi dya kumanya nè kùdi ntùukà wa dipàndukila bwà bantu aba bàdi. . . bàdi bàjinga kupànduka. Nè njila awu ùdi ku Yesù Kilistò, Yèyè udi Mutòlokù wà—wà Davìdi awu. Nènku tudi tuKusàkidila, Taatù munanga, bwà diMutùma pa buloba, bwà nè Yèyè nguvwa Mutwàngaji utùdi mwà kuya kùdiYe; Udi mwà kutwàkwila, nè kuumusha mpèkaatù yètù, bwà twàmòna mwà kupànduka ku cijji cicolè nè dipiishiibwa dya kùdi Nzambi. Tudi bamanyè nè cijji cicolè cilwalwà. Nènku aci, bu mwàkamba Yone mu matùkù à kale nè: “Nyeemàayi cijji cicolè cilwalwà aci.”

<sup>211</sup> Mpindyewu, Mukalenge, tudi tulòmba bwà patùdi twangata Mèèsà à Mukalenge dilòlò edi apa bwà Wèwè kutùjidila, Mukalenge, nè Mashi Èbè makezudi; nè swàkù bwà dìnà mpèkaatù yònsò nè bantu aba àlekelediibwe. Ndi ndòmba nè didipwekesha dyònsò nè meeji matòoke ònsò, Nzambi, bwà nè Kùlekedikù muntu nànsha umwe wa ku twètù uàngata kàyi mukùmbànyine to. Bwalu Wèwè udi mwàmbe mu Dìyi Dyèbè nè, twètù benze nànkù, tudi bapiile kùdi Mubidi nè Mashi à Mukalenge. Mpindyewu, Taatù, vwijàku bantu aba bàà cijila nè balàmbùdiibwe, bwà twàmòna mwà kwangata cyòci eci katùyi nè kalèma to.

212 Nè mpindyewu, Taatù, tudi bamanyè nè Mèèsà à Mukalenge àkafidiibwa dyàmbedi mu Èjiipitù. Nènku bantu bààkangata Mèèsà à Mukalenge abu, mwànà wa mùkòòkò nè dyàmpà, pàvwàbò bàpàtuka apu, bààkenza lwendu mu cipèèlà munda mwà bidimu makùmi ànaayi; nè kakùvwa muntu nànsha umwe nè butekètè munkaci mwàbò pààkapàtukàbo mu cipèèlà to. Bààkangata Mèèsà à Mukalenge.

213 Nzambi ikalèku nè luse. Ndi ndòmba bwà babèèdi bònso bòn dopiibwè, bajìmine bònso bàsùngidiibwè. Nè aba bàdi nè maalu à kwìsùkwìsù nè kabàyi bàcyùka maalu abu, swàkù bwà bàseemenè pabwìpi nè tupyà twà Nzambi, tùnàngulula misùùkà yàbò. Enzàku nàнку, Mukalenge. Tùfwilèku luse mpindyewu nè tùkwàcìshèku. Tudi tulòmba mu Dìna dyà Mwán'Èbè.


214 Nènku patùcidì nè mitù yetù miinyika apa, ndi ndìkonka (pàdi mwanèètù wa balùme útùpèèshakù cyonà cikesè ku cisanji cyà pyànò apa) kwòkò muntu kaaba aka udi mufwànyine kwela cyanza muulu kwamba nè: “Mwanèètù Bill, nè meeji matòòke ònsò ndi—ndi. . . bwà ngiikàdìlù wa musùùkà. Ndi—ndi—ndi muswè bwà ùmvùlùkèku. Ndi—ndi—ndi muswè kwakidila Nyumà Mwìmpè.” Udìkù mwà kwela cyanza muulu anyi? Wamba nè: “Wàmùlùkàkù.” Nzambi àkubènèshè. Nzambi àkubènèshè, nè wèwè, nè wèwè, nè wèwè, nè wèwè. Nzambi àkubènèshè, nè wèwè. Nzambi àkubènèshè, inàbànza, wèwè, nè wèwè, wèwè, Mwanèètù wa balùme. Ekèlekèle, byanza bìdi myaba yònsò's. Nzambi àkubènèshè, Mwanèètù wa balùme. Nzambi àkubènèshè. Nzambi àkubènèshè, Mwanèètù wa bakàji. Wèwè, Mwanèètù wa bakàji, ndi mmòna cyanza cyèbè, bwà nè udi muswè kwakidila Nyumà Mwìmpè. Nzambi àkubènèshè, Mwanèètù wa balùme.

215 Kanwènaayikù baswè ànu ndambù wa lwendu lwà lutàmbe kwikala lwà sheemàsheemà. Nwàvùlùkàayi balundà bàànyì nè, tudi nè mwoyi pabwìpi nè Dilwa dyà Mukalenge wetù. Mpindyewu, Nzambi ùdi munkaci mwà kushìndika Mèyi Èndè, bimanyinu nè maalu à kukema bìdi myaba yònsò.

216 Mpindyewu, ncyà bushùwà nè Nzambi kí mmufwànyìnekù kulekèla mpatukè nè ngiikalè mwediiibwe maanyi kùdi Nyumà Mwìmpè bwà kwenza bimanyinu nè maalu à kukèma to, kwalukila nè kuyiisha Dìyi adi, nè bikwàbò, nè mufwànyine kucibènesha myaba yònsò, nè ngèza bintu ebi, pàdiYe kàyì mumpèèshe mmwènenù kampàndà wa Dìyi Dyèndè to. Yèyè kí mmufwànyìnekù kwenza nàнку to. Pa nàнку ndi mumanyè bushùwà cìndi munkaci mwà kwakula eci.

217 Pawikalà kùyì nè Yesù Kìlistò, kùyì nè Nyumà Mwìmpè to, Nzambi kàkulekedìkù nè diikisha to paùdi kùyì mupetè Nyumà Mwìmpè. Kùseeswishiiibu nànsha. Kùteecikù ànu bwà kwangata dìmwè dyà ku matonda à cikàmà kwìsù kuume ncyòng awu kàdi kwamba nè udi nè Nyumà Mwìmpè to. Kwèna upeta Nyumà

Mwîmpè paùdi witabuuja to. Kwêna witabuuja bwà kupeta Nyumà Mwîmpè to. Ndiipà dyà kùdi Nzambi. Pòlò wàkamba nè: “Nudi bapetè Nyumà Mwîmpè kacya nwítabuuja anyi?” Pa nàнку citàbùùjaayi. Nènku Nzambi ànùpèèshèYe.

<sup>218</sup> Mpindyewu, Taatù, bwà aba bàvwà béle byanza byàbò muulu abu, Ndi ndòmba bwà Ùbàpèèshèku Mupèrsonà wà Nyumà Mwîmpè mpindyewu mene. Àlweku Yèyè mu bwondòke bwònsò mu bààbùngì aba, byanza dikùmi anyi dikùmi nè bitaanu bìvwà bijuuke kuulu ebi. Ndi ndòmba bwà Úpeeshèku yònsò wa kùdìbo dibàtiiza dyà Buumùntù Bwèbè. Bùjiibweku tètè menemene nè Nyumà Mwîmpè, mu mùshindù wà nè bimanyinu nè maalu à kukèma byènzeke mu nsòmbelu yàbò, nebàmonè bimanyinu byà mìshindù yònsò. Bu mwàkambà Yesù nè: “Bimanyinu ebi nebìfilè aba bàdi bìitabuujà.” Enzàku nàнку, Taatù. Tudi tulòmba nè didipwekesha dyònsò mu Dìná dyà Mwànà Webè, Yesù Kìlistò. Amen. (Mwanèètù Neville.) 

54-0103E Nkonko nè Mandamuna #2  
Branham Tabernacle  
Jeffersonville, Indiana États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)